

محمود السعدني الأعمال المسرحية الكاملة



الجزء الأول

عزبة بني يوتي

سر حبيب سوا حورية و كاسون

بين النهديين

سر حبيب سوا حورية و كاسون

النصائين

سر حبيب سوا حورية و كاسون

الأوزنس

سر حبيب سوا حورية و كاسون

<http://arabicivilization2.blogspot.com>

الهيئة المصرية العامة للكتاب



الأعمال المسرحة حين الكمالية

محمود السعدني

الجزء الأول

□ الأور نس

مصرحة من ثلاثة فصول



المكتبة العامة للكتاب في دولة فلسطين



mohamed khatab

الأورنس

سرمية مع ثلاثة ضفوف

<https://maktbah.net>

الفصل الأول

المنظر

يفتح الستار عن شارع يبدو من مظهره مظهر الدكاكين ومختلف المعالم . انه شارع فى حى شعبي . على يمين الشارع مكوجى الأمراء ومحل بقالة يرفع علمين احدهما اخضر والآخر احمر وعلى الجدار كلمة مكتوبة بالحبر ويخط ردىء . « ملك الملوك اذا وهب لا تسألن عن السبب الله يعطى من يشاء فقف على حد الأدب . فى يسار الشارع دكان مخدم ، الياقطة التى تعلو الدكان مكتوب عليها بخط واضح « مخدم عمومى شتودة حكيم » . اثناء فتح الستار يتصاعد فى الجو صوت صفارة الانذار معلنة وقوع غارة جوية . الوقت ظهرا والتاريخ صيف سنة ١٩٤١ عندما تستقر الستارة يظهر بعض الناس على المسرح يهرولون فى ذعر نحو المخبا الذى يقع فى نهاية الشارع . يخرج عبده المكوجى من محله فيرى المعلم قطب جالسا امام الدكان .

عبده : انت لسه مرنخ مطررك يا قطب ماتقوم تروح المخبا لقبلة تقع فوق دماغك تاخذ اهلك .

قطب : وهو المخبا حاشوف القنابل يا ضلالى مادام نضيف يبقى مايهمكش .

عبدہ : وهو الطيار الألماني حييى يشوف ده نضيف ولا وسخ قبل
ما يرمى القنابل .

قطب : وهو الألماني اللي بيرمى يا غشيم دا ربنا .

عبدہ : تعرف لو ربنا اللي بيرمى صحيح أول قنبلة يرميها ..
ليرميها عليك انت .

قطب : ليه هو أنا ضللى زيك .. الحمد لله بينى وبينه عمار .

عبدہ : قوم يا راجل يا غشيم .

قطب : لا مش قايم وعلى العموم دى غارة المانى .

عبدہ : وعرفت انها المانى ازاي هتلكر كان جوز أمك .

قطب : ماهو عشان انت واللى زيك حمير مش ممكن تفهموا انما

أنا اعرف الطائرة من صوتها .. فلما تكون المانى يحصل

اطمئنان عشان من غير مؤاخذه الألمان أجدع طيارين فى

العالم بيرموا القنابل ع الانجليز بالمظبط .. مش بيضربوا

عميانى زى الطلائنة .

(يظهر اثناء الحديث سمير وهو يرتدى بدلة عامل ومعه
مجلة الاثنين)

سمير : والله اللي يسمعك يا قطب يقول ده من أركان حرب رومل .

قطب : أهلا سمير تعالى أقعد جنبى هنا والا حتروح المخبأ انت
راخر .

سمير : لا مش رايع مخابىء .. انت لسه عايش يا عبده ..

ازاي قرايبك الانجليز .

عبدہ : عال بيسلموا عليك .

سمير : أنا شايفك امبارح ماشى من هنا ومعك واحد انجليزى

طويل قوى زى اللوح .

عبدہ : دا مش انجليزى .. ده استرالى .

قطب : استرالى انجليزى أهم كلهم ولاد حرام ..

سمير : انما ده وشه أحمر قوى عامل زى عجل الوسية .

عبدہ : ما كلهم وشهم أحمر يا كروديا .

قطب : صحيح الحكاية دى حتجننى اللي مافيهم واحد وشه أصفر

والا دبلان والا عنيه منفخة كلهم مرسومين حاجة تجن .

(تسمع صوت فرقة فى الجو)

عبد : ياتهار اسود دا الضرب حمى مش حاتقوم يا قطب

قطب : لا روح انت انا حققد هنا مع سمير

عبد : خليك قاعد اياك واحد المانى يرقعك قنبلة ونرتاح منك

قطب : خد رايح فين

عبد : رايح المخبأ

قطب : ولع قبل ما تمشى

عبد : اولع ايه فى الغارة دى

قطب : يعنى انت شايف الدنيا كحل قوى ما احنا فى عز الضهر

والشمس ما شاء الله مللعة ٠٠ ولع ماتبقاش ندل أمال

عبد : اتفضل ولع كمان

قطب : لا مش مولع دلوقت ٠٠ خليها لبعء الغارة

عبد : (وهو يهم بالانصراف) وليه بعد الغارة ٠٠ حوشها احسن

٠٠ ولا اقولك خللها

(يسرع عبده وظهره نحو المتفرجين الى المخبأ ٠٠ يتابعه

قطب بنظراته ثم يهز رأسه أسفا)

قطب : معلش يا زهر ٠٠ عبده معاه علبة سجائر صفيح ٠٠

بقى دا مش طبيخ ٠٠ انما على رأى سعد باشا ٠٠ مافيش

فايدة ٠٠ ماتقوم تروح المخبأ يا سمير ٠٠

سمير : دى مش غارة يا راجل دى تهويشة

قطب : تهويشة ازاي بقى من غير مؤاخذة

سمير : الانجليز بينقلوا الجرحى بتوعهم م الميدان ٠٠ يقوموا

يعملوا غارة عشان الناس تستخبى وماحدش يشوف

وكستهم ٠٠

قطب : يا سلام ٠٠ عفارم عليك يا واد يا سمير ٠٠ عليك مخ ٠٠

انما ياخسارة على رأى سعد باشا ٠٠ مافيش فايدة ٠٠

سمير : ايه حكاية مافيش فايدة دى بقى

قطب : قصدى الانجليز ٠٠ مكسورين مكسورين ٠٠ عشان

لامؤاخذة مافيش راجل فيهم جدع

سمير : وهيه الحرب جدعنة يا قطب ٠٠

قطب : مش قصدى ٠٠ صبرك على ٠٠ لو الانجليز فيهم راجل
جدع ٠٠ يقوم يفتش ع الناس الجدعان اللي في البلد دي
٠٠ ويقولهم تعالوا ٠

سمير : تعالوا على فين ؟

قطب : ع الميدان ٠٠ تعالى يا قطب ٠٠ تعالى يا سمير ٠٠ ويدى
كل واحد ألف جنيه ٠٠ مش يشغلوا العالم الصايعة ٠٠
ويسبيوا الناس الجدعان قاعدين يهرشوا جنب الحيط ٠

سمير : طيب وتروح الميدان تعمل ايه يا قطب ؟

قطب : أحارب ٠

سمير : وهو انت تعرف تحارب ؟

قطب : كل شيء ممكن بالصدقة ٠٠ همه بس يسلموني مدفع
وطباشيرة وبس ٠

سمير : طب سلموك المدفع والطباشيرة ٠٠ هتعمل ايه ؟

قطب : (ينهض واقفا) يا سلام ٠٠ اشيل المدفع على صدرى كده
٠٠ واقف فى الميدان ٠٠ ماهو الميدان واسع ٠٠ وكل طيارة
فايته (بصوت عال) طاخ ٠٠ طيخ طاخ ٠٠ بعون الله كل
الطيارات لازم تقع ٠

سمير : طب وقعت الطيارات ايه اللي هيحصل ٠

قطب : بالطباشيرة واكتب ٠٠ كل طيارة تقع اكتب عليها قطب ٠٠
ولما النهار يطلع ويجى تشرشر ويعد الطيارات عشرة قطب
وثلاثة مش بتوعى ٠٠ آخذ الألف جنيه ٠ وكمان ظابط
بنجمة ٠٠ هات سيجارة ٠

سمير : مانت لسه واخذ من عبده ٠

قطب : انت حاتحاسبنى ٠

سمير : طب خد ٠

قطب : ولعلى ٠

سمير : اتفضل (يشعل له السيجارة)

قطب : (يسحب نفسا عميقا) يا سلام ٠٠ دى نفسها حامى قوى
٠٠ الغرض ٠٠ أنا بقى ظابط من هنا ٠٠ واجيب العساكر
الانجليز من هنا ٠٠ واسلم كل واحد مدفع وتباشيرة ٠٠
واللى ما يوقعش طيارة ٠٠ الزقه ٠

سمير : تلزقه ؟ تلزقه ازاي ؟

قطب : على قفاه .

سمير : بقى كل الشغلانة دى عشان تلزق العساكر على قفاهم .

قطب : امال .. ولو حصل .. لازم يكسبوا الحرب بعون الله .

سمير : انشا لله تنهرش فى مخك يا قطب .. بقى لما تلزق العساكر الانجليز يا راجل .. يكسبوا الحرب ..

قطب : ماهو عشان انت بهيم زى عبده مش هاتفهم .. انما تعرف

.. من غير كده مافيش فايدة وتعرف كمان .. لازم اجيب

معاهم باذن الله الواد المخبر عبد ربه اللى فى المركز

والزقه راخر .. عشان الظلم بتاعه .

سمير : ليه ؟ عمل ايه راخر .

قطب : آل ايه اول امبارح مقابلنى فى السكة يقولنى بتشتغل ايه

(ينهض واقفا) ربنا يفوت الايام دى على خير . وحياة

النبي يوم المنى عندى يوم ما ينكسر الانجليز .. انا ناوى

افرق عيش وفول ع الناس الغلابة .. انا ح اخش اريج

جنبى شوية .

سمير : طيب انا حاقعد هنا .. اذا جه زبون ابيعله ؟

قطب : وهاتبعله ايه يا حسرة .. بعله الحيطان بقى .. الدكان

مافيهاش غير الحيطان .

سمير : طب ماتجيب فيها بضاعة يا قطب .

قطب : منين .. قال اطبخى يا جازية .. كلف يا سيدي ..

التجارة عاوزه فلوس .. والتجار زى السمك .. الكبير

ياكل الصغير .. واحنا صغيرين ياسى سمير .

سمير : يا اخى بيع الفدان ونص اللى فى البلد واشترى بضاعة .

قطب : كفاية اللى بعناه .. انا لو شحت ماعملهاش تانى .. فدان

ونص اللى ليه فى البلد يعنى ابيعهم واشحت ..

سمير : تشحت ليه ؟ ما يمكن الحظ يضرب معاك ..

قطب : مايبضربش ابدا .. بقالنا ميت سنة مايبضربش معانا

الحظ .. ده يبضربنا .

سمير : ويعنى الفدان ونص ح يعملوا ايه .

قطب : اصلى .. ابيع اصلى .. تقدر تبيع ابوك .

- سمير** : لا طبعاً ..
- قطب** : وانا كمان .. الأرض مش ممكن أبيعها .
- سمير** : وأخترتها ..
- قطب** : زى ما ترسى دقلها .
- (ينصرف الى داخل الدكان ثم يعود بسرعة الى الخارج ويقول مستهزئاً)
خللى بالك م الرصيف والنبي ..
- (يعود للداخل)
- سمير** : (يقرا) الطريق الى القمة .. كيف تصبح مليونيرا .. قصة حياة المليونير فورد ملك السيارات فى العالم .. بدأ المليونير الأمريكى فورد عاملاً صغيراً فى الـ ..
- (يتوقف عن القراءة وينظر باهتمام نحو دكان المخدم)
- سمير** : هدية .. اتأخرتى ليه يا هدية .. انا بقالى مدة مستنيكى .
- هدية** : معلش يا سمير .. مدام شوشو مسكت فيه قعدت معاها . اصلها لوحديها يا عيني .
- سمير** : هيه وعملتلى ايه ؟
- هدية** : وضبتك كل حاجة .. اتفقت معاها على كل حاجة .. ومن بكره هتشتغل فى الصالة ..
- سمير** : بس أنا برضه الشغلة دى مش داخلة دماغى يا هدية .. انا بقول بلاش الحكاية دى وادى احنا قاعدين ربنا يسهل لنا وبيرزقنا بالقمة الحلال وهى ماشية .. وتجاوز ونعيش زى بقية الخلق .
- هدية** : يا عبيط الخمستاشر قرش اللى انت بتأخدهم فى شركة ماتوسيان هيعملولنا ايه .. دول ما يسقوناش ميه
- سمير** : اهى بكره تتعدل يا هدية واترقى وابقى اسطى قد الدنيا .. وتبقى خمسة وعشرين واللقمة الحلال مافيش احسن منها .
- هدية** : وهو احنا هنعمل حاجة حرام .. ماهى الناس كلها شغالة فى الأورنس ومبسوطة ودى حرب كلها مكسب ولازم نلطف حاجة منها .
- سمير** : بس أنا قلبى مش مرتاح للشغلانة دى .. وكمان انا خايف يا هدية ..

هدية : متخاف على ايه ٠٠ مش احسن م العيشة النكد اللي
كنت فيها ٠٠ الله يرحم ايام عمك شنودة ٠٠
شنودة : ماله عمك شنودة يا بت ٠ عمل فيكى ايه ٠٠ الله يرحم
المنديل أبو اوية والشبشب المقطوع ٠٠ عملناكى بنى أمة
غلطنا ٠

هدية : الله ٠٠ حنغلط بقى والا ايه يا عم شنودة ٠
شنودة : لا العفو يا ست هدية ٠٠ وهو انت بعد اللي عملتيه ٠٠
كان يصح أكلم جنبك العالى ٠

هدية : وانا ايه اللي عملته ٠٠ عملت عملة والا ايه ؟
شنودة : بقى تتبطرى ع النعمة ٠٠ وترفضي الخير برجليكي وترفضي
جنيه فى الشهر غير ألكك وشريك ٠٠ وتروحي تهزى وسطك
عند بديعة ٠٠ وبعد دا كله ماعملتيش ٠٠

سمير : دى مش عند بديعة يا عم شنودة ٠٠ دى عند شوشو
الفرنساوى ٠

شنودة : انعم واكرم ٠٠ لا والهيئة مطبوط تمام ٠٠ فرنساوى
خالص ٠٠ وايه اللي انت لابساه ده ٠

هدية : دى شاما زيت يا عم شنودة ٠
شنودة : زمزيكه ؟ والله عال يام زمزيكه ٠٠ الله ينعل أبو اللي بدع
الحرب ٠٠ لما هدية بنت عبد ربه لابسالى زمزيكه ٠٠
وحياة العذرا القيامة لتقوم ٠٠ زمزيكه قال ٠

سمير : الراجل عقله خف ياهدية ٠٠ من نهار الحرب والدكان بتاعه
خرب ٠٠ الخدامين كلهم راحوا الأورنس ياهدية ٠

هدية : كفايا اللي مصه من دم الناس ٠

سمير : غلبان يا هدية ٠٠ دا مش لاقى يهرش ٠

هدية : أهو زمان كانت الواحدة منا شاربة المر ٠٠ وهو قاعد طول
النهار يشرب زبيب ٠

سمير : أهو بيشرب من كيغانه دلوقتي ٠٠ الله يكون فى عونته ٠

هدية : هيه قلت ايه يا سمير ٠

سمير : أنا ماليش غرض اروح الشغلانة دى ٠٠

هدية : يا سمير ماتبقاش عبيط ٠٠ احنا هنفضل عايشين طول
عمرنا فى الطين اللي احنا عايشين فيه ده ٠٠ ما الناس

كلها انعدل حالها ٠٠ الطعمجى الى ماكانش لاقى ياكل
راح اشتغل ميكانيكى فى الأورنس ٠٠ والصايغ الضايغ
الى كان بيتمرمخ فى الشمس طول النهار راح اشتغل
فى الأورنس بالشئ الفلانى ٠٠ اشمعنى احنا ٠٠ ما نلف
الى نقدر نلفه ٠٠ ونعيش كويس ٠٠

سمير : احنا عايشين كويس ايه والحمد لله .

هدية : اسمع يا سмир ٠٠ بلاش عبط . الجواز عاوز فلوس ٠٠
والناس تبص ل فوق ٠٠ والانجليز فاتحين كنز لازم نغرف منه

سمير : دى فلوس حرام يا هدية ٠٠ واللى بيغرف منها بيغرف
هم وغم ٠٠ يا شيخة خلىنا فى حالنا احسن .

هدية : اسمع يا سмир ٠٠ اذا كنت بتحبني صحيح وعاوز
تتجوزنى تعالى معايا اشتغل فى الصالة .

سمير : وبس انا حاشتغل ايه يا هدية ٠٠ انا راجل بلف سجاير
فى الشركة ٠٠ هاروح اشتغل ايه فى صالة رقص ٠٠

هدية : حاشتغل صياد ٠٠

سمير : صياد ٠٠ حاصطاد ايه فى الصالة .

هدية : تصطاد انجليزى ٠٠ حتصطادهم بصور ٠٠ انت حتخرج
زى الجدعان الى فى الصالة ومعاك صور البنات .

(يظهر شقودة ومعه زجاجة عرق)

سمير : حلو قوى ٠٠ اشيل صور البنات ٠٠ وبعدين

هدية : وتسرح فى الشوارع ٠٠ تصطاد انجليز وتوريهم الصور
وتسحبهم ع الصالة .

سمير : وبعدين .

هدية : تاخذ على كل انجليزى خمسين قرش .

سمير : ودا مش عيب يا هدية ؟

هدية : عيب ايه يا سмир ٠٠ مادام الواحد محافظ على شرفه ٠٠
مايخافش من حاجة .

سمير : انا خايف عليكى يا هدية .

هدية : هو انا عيلة صغيرة يا سмир .

سمير : يعنى حنتننا نحب بعض يا هدية .

هدية : لحد ما نموت يا سмир .

- سمير : طيب ياللا يا هدية انا جى معاكى
شنودة : اما على رأى المثل • بلد تخاف ما تختشيش •• بلد عاوزة
الحرق •• احرقها بقى وخلصنا •
الجارحى : وهيحرقها ليه بس يا عم شنودة •
شنودة : الناس ضلت يا جارحى •• تعرف الواد سمير •• راح
يشغل فى صالة رقص •
الجارحى : الواد الصايغ ابو كرية ده •
شنودة : هوه ابو كرية يا جارحى •
الجارحى : دا مقابلنى دلوقت ماشى مع بت سنيورة •
شنودة : عارف السنيورة دى •• كانت أومخ منك •• وانت سبت
المخبأ ليه يابنى يا جارحى •• الغارة خلصت •
الجارحى : هوه باين ليها خلعان •
شنودة : آمال سبت المخبأ ليه •
الجارحى : يعنى ميحصلو ايه المخبأ •• أهو مدردك على دماغ الللى
فيه •
شنودة : طيب خد اشرب خد •
الجارحى : لا ياعم شنودة •• دا البتاع ده بيضخ فى الزور تقول
مية لفت ••
شنودة : خد اشرب يابن الفقيرة •• حد طایل •
الجارحى : هات (يشرب) يا سلام يا جدعان •• زى ما يكون البتاع
ده •• فيه أجزا •
شنودة : غنى لنا حاجة بقى •
الجارحى : يا زارع الود هو الود سجره قل •• والا سواقى الوداد
نزحت وماءها قل •
قطب : هو الواحد مايعرقش يستريح شوية ؟ ايه يا واد الدوشة
اللى انت عاملها دى •
الجارحى : طب دنا كنت صبييت وحياة سيدى عبد الباسط •• غيرشى
الهم راكب فوق قلب الواحد •
شنودة : انت كمان عندك هم •• عجائب •• طيب خد اشرب خد ••
(يصب ويعطيه فيشرب)

الجارحي : طب دنا عندى حكاية يا عم شنودة ٠٠ انما ليها العجب

قطب : احكى احكى ٠٠ عشان تبقى انت والغارة ٠

الجارحي : اصل أنا فى الحقيقة عندى قضية ٠

شنودة : قضية ايه بقى يابنى يا جارحي ٠

الجارحي : أنا من غير مؤاخذه قتلخت اختى ٠

شنودة : قتلخت اختك ٠٠

الجارحي : لا والنبي يا عم شنودة ٠٠ أنا راح احكيلك الحكاية زى

ما حصلت ٠٠ هو حصل شوية اشاعات انها ماشية بطل

من غير مؤاخذه ٠٠ والواحد بقى ماشى فى البلد

مدلل ودانه ومطاطى راسه ٠٠ والآخر جرجرتها فى ليلة

ناحية السواقى وخلصت عليها ٠٠ وجم خدونى ع الحكمة

٠٠ وأنا مظلوم وحياة النبي يا عم شنودة ٠

قطب : دا باين عليه سكران ابن الهرمة ٠

الجارحي : لا ٠٠ أنا مسكرتش يا عم قطب ٠٠ دنا راح اتجنن م

الحكاية دى ٠٠

شنودة : وبعدين يا جارحي ٠

الجارحي : وبعدين حطونى فى السجن ١٥ شهر ٠٠ وطلعونى بكفالة

٠٠ وبعدين الجيش طلبنى طلعت جيش مرابط ٠٠

شنودة : ولا يهكم يابنى يا جارحي ٠٠ خد اشرب خد ٠٠ (يعطيه

فيشرب)

الجارحي : يعنى اخد فيها اد ايه دى ٠٠

قطب : لادى عاوز مداولات يا جارحي ٠

الجارحي : يعنى ما تعرفش اخد اد ايه ٠

قطب : أقولك بس ما تزعلش ٠

الجارحي : والنبي تقول يا عم قطب ٠

(تضرب صفارة الأمان فجأة)

الجارحي : الحمد لله الغارة خلصت ٠

شنودة : وانت يعنى خلصت ٠٠ والا ماخلصتش ميحصلك ايه ٠٠

مانت قاعد ملقح ٠٠

الجارحي : واخرة التلقيحة دى يا عم شنودة ٠٠ دنا امبارح طول النهار

ماكلتش ٠٠ وحياء عم شنودة ما دقت الأكل طول النهار
٠٠ ولحد الوقت ماصدعته ٠

قطب : ليه ٠٠ صايم ٠

الجارحي : صايم ازاي بقى ٠٠ العربية بتاع الجيش اللي بتجيب
العيش ٠٠ كل ماتيجى ماتلاقينيش ٠٠ والنبي تجيب صاغ
يا عم شنودة ٠٠ هات صاغ لما أجيب سانكوتش ٠

شنودة : انت يا واد يا جارحي مش حتتفض م الصاغات بتاعتك دى
الجارحي : وانا حاعمل ايه بس يا عم شنودة ٠٠ قوللى بس انا
حاعمل ايه ٠

شنودة : خد الصاغ ايه ٠٠ تعرف ما تطلب تانى ٠
الجارحي : وانا يعنى كان بخطرلى يا عم شنودة ٠٠ حد يرضيه
الشحاة لنفسه ٠٠ احلفك بايه ماصدعت جنس حاجة من
ليلة امبارح ٠٠ يا خبر يا جدعان ٠

شنودة : اتوكل على الله بقى ماتهرش مخى ٠٠
الجارحي : (بهم واقفا) اما اروح أجيب السانكوتش واجى على طول ٠
(تدخل المسرح من شارع جانبي بكريه بنت المعلم قطب فى
ملابس رخيصة ولكن عصرية)

قطب : بت يا بكريه ٠

بكريه : ايوه يا بابا ٠

قطب : كنتى فين دا كله يابا ؟

بكريه : كنت عند خالتى ام سيد ٠

قطب : كل ده عند خالتك ام سيد يابا ٠٠ انا ميت مرة قلتك لما
تخرجى ماتعوقيش ٠٠ قلت كده والا لا ٠٠

بكريه : ماهية اللي مسكت فيه يابا ٠

قطب : ؟ يعنى كماشة مسكت فيكى ٠ كهربا مسكت فيكى (ينهض
غاضبا) مصيبة مسكت فيكى ٠٠ والله لاوريكى ٠٠

عبده : يعنى قاعد لوحده يا عم شنودة ٠

شنودة : الوحدة ولا جليس السوء يابنى ٠

عبده : وجليس السوء بتاعك راح فين ٠

شنودة : دخل الدكان دلوات ٠

عبده : هوه مش حبيطل نوم أبدا ٠

- شَنُودَة : لا دا ماخلش ينام الدور ده .. دا دخل يضرب بكريه *
- عبيده : هو مش حبيطل ضرب فى بكريه بقى .. البت كبرت يا عم
شَنُودَة .. والحال زى مانت عارف *
- شَنُودَة : والله يايى انا مايقيت عارف حاجة .. انت اللى بتعرف
يا عبيده *
- عبيده : ساعة الغارة سبت الواد سمير هنا راح فين *
- شَنُودَة : هدية جت خدته ومشيت *
- عبيده : هدية مين *
- شَنُودَة : البت الخدمة بقاعت زمان دى *
- عبيده : ماعرفتش راحت فين *
- شَنُودَة : انا اشعرفنى ..
- عبيده : ماعرفتش يا عم شَنُودَة راحت فين .. دنا بدور عليها
فى كل حنة *
- شَنُودَة : راحت فين يا شَنُودَة .. آه .. ولع سيجارة ولع ..
- عبيده : خد يا عم شَنُودَة *
- شَنُودَة : ابوه يا سيدى .. البت هدية .. والله يا عبيده مانى عارف
راحت فين .. انما انت مزغوف قوى كده ليه ؟
- عبيده : ابدًا يا عم شَنُودَة .. بس فيه مسألة كده .. وانا
ماشفتهاش من زمان *
- شَنُودَة : الغايب حجته معاه .. بكره تظهر *
- عبيده : مشيت بقالها كثير ..
- شَنُودَة : من شوية كده ..
- عبيده : طيب انا حخطف رجلى يمكن الحقها يا عم شَنُودَة ..
- شَنُودَة : روح يا عبيده .. روح والعذرا مريم القيامة اتقوم ..
(يخرج قطب من الدكان مجهدا)
- شَنُودَة : ايه لازمته بس يا قطب الضرب ده ..
- قطب : انا ماعنديش بنات تخرج يا عم شَنُودَة .. الله .. هو
احنا الفرنكة يا اخى ..

شنودة : برضه بالسياسة أحسن .. كل شيء أحسن بالسياسة ..
عارف الانجليز دول .. غلبوا العالم بالسياسة

قطب : الواحد مايقاش يستحمل بقى يا عم شنودة .. الواحد
هياقها منين والا منين .. هات سيجارة يا عم شنودة
.. هات

شنودة : والله يابنى يا قطب ما معايا .. دا السيجارة دى واخدها
م الواد عبده ..

قطب : الله .. هو رجع .. راح فين آمال ..

شنودة : جرى يدور على هدية .. ساعة ما سمع انها كانت هنا
بقى زى المجنون ..

قطب : الله يسهل لعبيده ..

شنودة : قصدك ايه يا قطب ..

قطب : قصدى انها وزه كويسه ..

شنودة : وزه ازاي بقى يا قطب ..

قطب : هز يا وز ..

شنودة : كلامك كله بقى الغاز .. اليومين دول يا قطب ..

قطب : ماهى الدنيا بقت الغاز كلها .. حد بقى فاهم حاجة ..
اليومين دول ..

شنودة : انما كله كوم وحكاية الوزه دى كوم ..

قطب : الله بقى .. آمال انت فاهم عبده لابس السكرتة والجزم
الكاوتش ومركب السنان الذهب دى منين .. ماهو م الوز
يا عم شنودة ..

شنودة : وهو عبده المكوجى بتاعنا ده .. بيبيع وز ..

قطب : لا ما بيبعش .. بياجر ..

شنودة : الوز بيتاجر يا معلم قطب ..

قطب : ايوه .. الانجليز بياجروه ..

شنودة : (يضحك) يوه يوه .. اياك وز لابس زمريكة ..

قطب : اسم الله عليك ..

شنودة : (يضحك) الله يقطعك يا قطب .. على كده الواد عبده
بيشتغل فرارجى ..

- قطب** : مورد وانت الصادق يا عم شنودة •
- شنودة** : (يضحك) والله انا افكرت وز بصحيح يا قطب •• الله يقطعك •• طيب ماتشوفلك ياواد وزه من دول •• وتورد انت راخر ••
- قطب** : الله الغنى يا عم شنودة •• ربنا يغنيها بالحلال يا شيخ •
- شنودة** : مابتغنيش بالحلال •• يمكن تتغنى بالوز (يضحك) انا بالحق كنت فاهم انه وز بصحيح •• الله يقطعك يا قطب •
- قطب** : انما مش وز مطبوط يا شنودة •
- شنودة** : (يضحك) مطبوط ياواد يا قطب ••
- قطب** : بذمتك مانفسك فى وزه ••
- شنودة** : الله يقطعك يا قطب •• بينى وبينك نفسى فى الوز بصحيح •
بس يا واد يا قطب مابقتش أقدر •• معدتى مابقتش تهضم ••
الله يقطعك يا قطب •• انا كنت فاهم انه وز بصحيح •
(يدخل الجارحى قادما من ناحية المخبأ ومعه سندوتش)
- الجارحى** : والنبي تقوللى بقى يا عم قطب ••
- قطب** : حقوك ايه ياواد ••
- الجارحى** : قوللى والنبي ••
- قطب** : أقول ايه •
- الجارحى** : قوللى الحكم والنبي ••
- قطب** : الحكم بتاع ايه ••
- الجارحى** : بتاع القضية ••
- قطب** : قضية بتاع ايه ••
- الجارحى** : القضية اللى حكيتهاك من شوية ••
- شنودة** : قضية اخته •• احكمه يا اخى فيها خللى عندك ذوق ••
- قطب** : قضية اخته بتاع ايه ••
- شنودة** : اخته •• الوزه اللى دبها فى البيت ••
- الجارحى** : والله صدقت يا عم شنودة •• والله ولا الوزه •• والله
- ماستحملت اى حاجة فى ايدى ••
- قطب** : ومظلوم يا متهم •• دنا هارقك حكم منيل ••
- الجارحى** : ليه بس يا عم قطب ؟

- شنودة : الرافة يا قطب .. خللى فى قلبك رحمة .. الراجل بيع
الوزة ما اجرهاش .
- قطب : يعنى لو كنت اجرتها يابن الخايبة .. مش كان زمانك لابس
سنان دهب دلوقت .
- الجارجى : هيه ايه اللى ها اجرها ياخواتى .
- شنودة : الوزه (يضحك) الا حكاية الوزه دى .. بقى عبده فرارجى
الجارجى : عبده مين اللى فرارجى يا عم شنودة .
- قطب : ماتتكلمش يا متهم لرقعك حكم يجيب اجلك ..
- الجارجى : انا ساكت اهمه يا عم قطب .
- قطب : طيب احكم عليك قانونى يعنى
- الجارجى : اى والنبي يا عم قطب .
- قطب : يعنى قانونى زى المحكمة تمام .
- الجارجى : اى والنبي يا عم قطب .
- شنودة : بقى الواد عبده فرارجى (يضحك) .
- الجارجى : هو الواد عبده حيقلب فرارجى .
- قطب : ماهو قالب من زمان ياواد يا جارجى .
- الجارجى : امال هيه فين الفراخ اللى فى الدكان .
- شنودة : مافيش فراخ عنده وز بس ..
- الجارجى : وفين الوز ده .. يعنى مش باين حاجة .
- شنودة : اصل فيه وزه شردت منه كده راح وراها .. خد اشرب خد
- قطب : احكم عليك قانونى يا جارجى ..
- شنودة : ما تحكم بقى يا اخى وتخلصنا .
- قطب : ولا تزعلش يا واد يا جارجى .
- الجارجى : وهازعل م الحق .
- قطب : طيب روح هاتلنا سيجارتين ..
- الجارجى : والنبي ما معايا ريحتهم يا عم قطب ..
- قطب : طيب خد .. حكمت المحكمة بالاعدام .
- الجارجى : ليه بس يا عم قطب كده .. دنا غلبان يا عم قطب .. دنا
مسكين يا عم قطب .. انا مظلوم والله يا عم قطب (يبكى).
انا والله غلبان يا عم قطب ..

شنودة : ماتبطل خوة وقلية دماغ ٠٠ يعنى المستشار قطب حكم عليك
الجارجى : انا غلبان يا عم شنودة ٠٠ انا مسكين يا عم شنودة (بيكى)
شنودة : اخص عليك راجل عرة ٠٠ دا انت باين سكرت بصحيح ٠
الجارجى : والله ما سكرت يا عم شنودة ٠٠ دنا بس غلبا نوالله ياعم
شنودة ٠

شنودة : يخرب بيتك ٠٠ يعنى أسيب لك الحقة وامشى (صفارة
الانذار)

شنودة : دا باين نهارك مش فايت النهارده ٠

الجارجى : هيه الغارة ضربت ٠٠

قطب : طرشت ٠٠ مانتش سامع ٠٠

الجارجى : أما اروح اتمم على المخيا ٠٠

(الجارجى يجرى نحو المخيا)

شنودة : بقى الواد عبده فرارجى يا جدعان ٠٠ أما حكاية ٠٠
اتارى الواد مركب سنان دهب ٠٠ وعلب صفيح انجليزى
٠٠ الا حكاية فرارجى دى ٠ وحياة العذرا ٠٠ القيامة
للقوم ٠٠

قطب : حا اقطع من لحمى يعنى ٠٠ ما تاكلوا طوب زى ما بناكل ٠

أم بكريه : وهو فين الطوب ده يا معلم ٠٠ الطوب بقاله سعر راخر ٠

قطب : كلوا تراب ٠٠ كلوا طين ٠٠ انا خلاص زهقت ٠

شنودة : ايه الزعيق ده بس يا قطب ٠

قطب : حاجة تجن يا عم شنودة ٠٠ كل شوية هات فلوس ٠٠ هات

فلوس ٠٠ هات فلوس ٠٠ هو انا ايه ٠٠ بنك ٠٠ دا حتى

البنك يقفل ٠٠

شنودة : الله يكون فى عونك يابنى ٠ صاحب الغيال دايم بالمشكل ده

م بكريه : العيال عاوزه تاكل يا عم شنودة ٠٠ بقوله ٠٠ هات بريزة

نجيب بيها حاجة للعيال ٠٠ طلع جنونته علينا ٠٠

شنودة : معلش يا أم بكريه ٠٠ دا الصبر حلو ٠٠

أم بكريه : يعنى نعمل ايه يا عم شنودة ٠

شنودة : الصبر يا بنتى ٠٠ الصبر ٠٠

أم بكريه : وبعد الصبر يا عم شنودة ٠٠ الواحد صدى ولضى وبقي

حاله حال ٠٠ أنا عمرى ماشفت المر دا ياخواتى ٠٠
أروح فىن ياخواتى ٠٠

قطب : ماحدش غلا علينا المش غير ولاد بديعة دول ٠

شنودة : ربك كبير ٠٠ بكرة القيامة لتقوم وحياة العذرا مريم
قطب : قيامة ايه اللى انت ماسكهالنا ٠٠ هيه حتقوم غير قيامتنا
أحنا ٠٠ يا راجل قول يا باسط هو المقت نازل غير من
عمالنا أحنا ٠٠ دول بياكلوا عيش فينو ٠٠ عيش فينو
والله ٠٠

شنودة : بكرة كله يتساوى ٠٠ اللى كل فينو ٠٠ واللى كل ملطوش ٠
عبده : اتسضل يا حاج فهمى ٠٠ اتسضل ٠٠ سعيدة يا خواجه
شنودة ٠٠ ازيك يا قطب ٠

شنودة : سعيدة مباركة يابنى يا عبده ٠٠ لحقت البنت ٠
عبده : لا والله يا عم شنودة (ناظرا للحاج فهمى) اتفضل يا حاج
٠٠ اتفضل اقعد ٠

فهمى : أنا والله كنت عاوز اتكلم وأنا واقف كده ٠٠ انا أصلى
ورايا ميعاد مع واحد طيب زى حضرتك ٠٠ عشان
حنشترى لوط عربيات ٠

قطب : ايه اللوط دا من غير مؤاخذة ٠

فهمى : والله مانى عارف ٠ أنا باسمع لوط لوط أقول أنا راخر
لوط ٠٠ باروح اعاين وادفع على طول ٠٠ فلوسى حاضرة
والحمد لله ٠

قطب : ربنا يزيدك من نعيم الله ٠

عبده : الحاج فهمى باختصار عاوز يشتري الشارع ٠

شنودة : يشتري الشارع ٠٠ حد بيشتري الشارع ٠٠ دا الشارع
بتاع الحكومة ٠٠

عبده : مش قصدى الشارع يعنى الأسفلت يا عم شنودة ٠٠ الحاج
فهمى راجل ألفى وفلوسه حاضرة والحمد لله ٠

شنودة : والكلام المفيد يعنى عاوز ايه ٠

عبده : عاوز يشتري البيوت يعنى من غير مؤاخذة ٠

فهمى : وأنا حاشترىها يعنى اعمل بيها ايه ٠٠ انا حاخد انشاء الله
وأبيعها انقااض وحشترى ازيد من سعر السوق ٠٠ وفلوسى
حاضرة والحمد لله ٠

- قطب** : وحاشترى بكام يعنى من غير مؤاخذه •
- فهمى** : زى مايكون • وفلوسى •
- شنودة** : حاضرة والحمد لله •
- قطب** : برضه ماعرفناش حاشترى بكام •
- فهمى** : أنا اشتريت فعلا • كلهم باعوا • آخرهم كان عبده • وباع النهاردة •
- شنودة** : بعث بكام يابنى يا عبده •
- عبده** : الحاج فهمى دفع ألف •
- فهمى** : ودفعنا وخلص • وأنا احب اخلص بسرعة • وفلوسى حاضرة والحمد لله • قلت ايه يا معلم قطب •
- قطب** : يفتح الله •
- فهمى** : يفتح الله على ايه • احنا لسه ماتكلمناش •
- قطب** : من غير كلام • يفتح الله •
- فهمى** : وهو الكلام مش أخذ وعطا •
- قطب** : وحنطب نفسنا فى الكلام والآخر برضه ح قول يفتح الله •
- فهمى** : انت باين عليك مستغنى • على كل حال فكر • ولما يوافقك انا جاهز وفلوسى حاضرة والحمد لله •
- عبده** : ماتبيع بقى يا قطب وتخلصنا • الحاج فهمى حيدفع ألف جنيه •
- قطب** : ولا ميت ألف واللى خلقك •
- عبده** : ليه بقى • يعنى هـرم خوفو ياخى • دى حتى دكانك مایسواش نكله •
- قطب** : يسوى بقى والا مایسواش • مش حبيعه ! •
- عبده** : انت حاكم لكع يا قطب • خلاص يا حاج فهمى • هـو حبييع •
- قطب** : عجایب • بقولك مش حبييع • انت ايه مابتفهمش •
- عبده** : يعنى الدكان ماشاء الله قوى • ايه رايتك ياعم شنودة •
- شنودة** : والله يابنى أنا مالیش رأى فى المواضيع دى • كل حى عقله فى راسه يعرف خلاصه •
- قطب** : أبیع ازای • دا الدكان مركز • ابیع مركزى يعنى •

- عبدده** : يعنى مركز بوليس ياخى .. يلا بينا يا حاج فهمى ..
بكره بيع غصب عنه .
- فهمى** : هوه حر بس نهار ماتوافق يا قطب .. انا جاهز وفلوسى
حاضرة والحمد لله .. ياللا بينا يا عبدده .. (يهمان
بالانصراف)
- قطب** : خد يا عبدده ..
- عبدده** : ايه .. انت طمعان فى حاجة زيادة .
- قطب** : انا عاوز ريال منك لحد بكره .
- عبدده** : انت ماكل يوم تاخذ ريال وتقول لحد بكره .. هوه بكره
دا مش حيبجى ..
- قطب** : بكره ربنا يعدلها .
- عبدده** : يا اخى ماتبيع .. فرصة .. حد لاقى ..
- قطب** : أبيع واروح فين يا عبدده .. دى دكانة وببيت .. وانا
عندى كرم لحم .. بقى ارميهم فى الشارع ..
- عبدده** : ألف جنيه يالوح تشتري بيهم طيارات لو عاوز ..
- قطب** : واخرتها حتعمل ايه .. ماهم برضه حيروحو و نرجع
نشحت .. ع الأقل دلوقت بنشحت واحنا مداريين فى
الحيطان ..
- عبدده** : (يناوله الريال) خد .
- قطب** : بت يا بكرية ..
- بكورية** : نعم يابا ..
- قطب** : خدى ادى الريال ده لأمك وقولى لها انى اسـتـلفـته من
عمك عبدده .
- عبدده** : انت عاوز حاجة تانى يا قطب ؟
- قطب** : لا كفاية كده .. كتر خيرك يا عبدده .
- عبدده** : لتكون عاوز حاجة زيادة .
- فهمى** : ان كنت عاوز حاجة زيادة يا قطب انا فى الخدمة .. انا
جاهز وفلوسى حاضرة والحمد لله .
- قطب** : تشكر يا حاج فهمى .
- فهمى** : بس تعالى خد ماتبقاش دماغك ناشفة .

عبيده : انت ماشاء الله بقيتي حاجة حلوة قوى .. الواحد من
قلبة دماغه ماكنش واخذ باله منك يا قمر .

بكـرية : الله .. جرى ايه يا عم عبيده .

عبيده : عم عبيده دا ايه .. قوليلي يا عبيده على طول .. تعرفي
لو خدت بالي منك من زمان .

بكـرية : يعني كنت حتعمل ايه .

عبيده : اعمل ايه .. الكلام الفارغ اللي انت لابساه ده .. مش
مقامك .. انت لازم تلبسى حرير ودهب وتاكلى فراخ
على طول .

بكـرية : والنبي يا عم عبيده انت طول عمرك تحب التماليس ..

عبيده : دا مش تماليس يا بكـرية .. انت تستاهلي ثقلك دهب ..
اسمعى .. هاتى الريال اللي معاكى دا .

بكـرية : انت رجعت فى كلامك تانى .

عبيده : فشر يا جميل .. دنا خدامك .. خدى ورقة بجنيه ايه ..
فكيها اديهم ريال والباقي عشان عيونك انت ..

بكـرية : جنيه يا عم عبيده .

عبيده : ماقلنا بلاش عم نيلة دى .. خليها عبيده كده على طول .
بكـرية : بس كل ده .. وانا حاصرف الجنيه فين رالا فين .

عبيده : بكره اعلمك انا .. دا الجنيه بيتصرف فى دقيقة يا غزال .
بكـرية : لا والنبي يا عم عبيده .. خد فلوسك انا مش عاوزاها .

عبيده : وبعدين معاكى بقى .. ابوكى يسمعننا تبقى حكاية ..
وعلى فكرة .. اى حاجة تحصل بيني وبينك بعد كده ..
مش عاوز ابوكى يعرف عنها اى حاجة ..

بكـرية : وهو ايه اللي حيحصل بينا يا عم عبيده .

عبيده : ولا حاجة .. كل خير انشاء الله .

قطب : الله .. جرى ايه .. ايه الحكاية يابت يا بكـرية .

بكـرية : لا بابا .. اصل ال ..

عبيده : الريال فيه حته بعشرة وحشة .. غيرتها لها .

قطب : تشكر يا عبيده .. وانت يابت خشى جوه وبلاش لكاعة بقى
بكـرية : حاضر بابا .

عبيده : انت ماشاء الله بقيتي حاجة حلوة قوى .. الواحد من
قلبة دماغه ماكنش واخذ باله منك يا قمر .

بكرية : الله .. جرى ايه يا عم عبيده .

عبيده : عم عبيده دا ايه .. قوليلي يا عبيده على طول .. تعرفي
لو خدت بالي منك من زمان .

بكرية : يعني كنت حتعمل ايه .

عبيده : اعمل ايه .. الكلام الفارغ اللي انت لابساه ده .. مش
مقامك .. انت لازم تلبسي حرير ودهب وتاكلي فراخ
على طول .

بكرية : والنبي يا عم عبيده انت طول عمرك تحب التماليس ..

عبيده : دا مش تماليس يا بكرية .. انت تستاهلي ثقلك دهب ..
اسمعي .. هاتي الريال اللي معاكى دا .

بكرية : انت رجعت في كلامك تاني .

عبيده : فشر يا جميل .. دنا خدامك .. خدى ورقة بجنيه ايه ..
فكيها اديهم ريال والباقي عشان عيونك انت ..

بكرية : جنيه يا عم عبيده .

عبيده : ماقلنا بلاش عم نيلة دى .. خليها عبيده كده على طول .
بكرية : بس كل ده .. وانا حاصرف الجنيه فين رالا فين .

عبيده : بكره اعلمك انا .. دا الجنيه بيتصرف في دقيقة يا غزال .

بكرية : لا والنبي يا عم عبيده .. خد فلوسك انا مش عاوزاها .

عبيده : وبعدين معاكى بقى .. ابوكى يسمعنا تبقى حكاية ..
وعلى فكرة .. اى حاجة تحصل بينى وبينك بعد كده ..
مش عاوز ابوكى يعرف عنها اى حاجة ..

بكرية : وهو ايه اللي يحصل بينا يا عم عبيده .

عبيده : ولا حاجة .. كل خير انشاء الله .

قطب : الله .. جرى ايه .. ايه الحكاية يابت يا بكرية .

بكرية : لا يابا .. اصل ال ..

عبيده : الريال فيه حنة بعشرة وحشة .. غيرتها لها .

قطب : تشكر يا عبيده .. وانت يابت خشي جوه وبلاش لكاعة بقى

بكرية : حاضر يابا .

- فهمى : مافيش فايده يابنى يا عبده .. دماغ قطب ناشفة قوى
عبده : الناشف بكره يلين .. وربنا يحنن قلبك علينا يا جميل
قطب : جميل .. انت عميت والا ايه يا عبده .. فاهمنى وزه
والا ايه .
- عبده : وزه .. فشر .. دانت طاووس يا جميل .. سلامو عليكو
يا حلو .. ياللى تستاهل تقلك دهب .
- فهمى : احنا خدامين يا عبده .. ساعة مايقول يابيع انا جاهز
وقلوسى حاضرة والحمد لله .
- عبده : ياللا بينا يا حاج .. نهارك سعيد يا خواجه شنودة .
- قطب : آل ابيع الضلالى .. طيب على الطلاق مانا بايع .
- شنودة : مع السلامة يا حاج فهمى يابو فلوس جاهزة والحمد لله ..
وحياة العذرا القيامة لتقوم .
- (سقار)

المشهد الثانى

من الفصل الأول

نفس المنظر الأول ، شارع عباس فى الصباح الباكر وقد
خلا من المارة ٠٠ عبده جالسا أمام الدكان على كرسى قش
٠٠ دكان شنودة لا يزال مغلقا ٠ يبرز قطب فجأة من
داخل دكانه ، معه جردل فيه ماء وعيذاه لاتريان من اثر
النوم ٠٠ ينحنى على الجردل ويبدأ فى غسل وشه :

عبده : بقى دى خلقة تقابل بيها ربنا

قطب : (يرفع راسه الى أعلا وقد ابتل بالماء) دا مين ده ، عبده
داهية تاخدك ٠٠

عبده : بقى حد ينام فى دكان يا خايب ٠٠

قطب : (مانامش) ليه ؟ مادام بشرفى ٠٠ والنبي أنا انام على
الرصيف مادام بشرفى ٠

عبده : يعنى همه اللي نايمين فى البيوت ماعندهم شرف ٠

قطب : ناس مقتدرين يا عبده ، لكن انا معنديش ٠٠ يعنى أسرق
٠٠ ولا اعمل زى بعضهم ٠

عبده : انت قادر تسرق ولا سرقتش ، دا قصر ديل يا ازعر ٠

قطب : قصر ديل يا عبده ؟ بصوا للورد مالقوش فيه عيب قالوا
يا أحمر الخدين ٠٠ تعرف اللي زيك يا عبده ٠٠ يموت

شحات ٠٠ أهو انت شوف بتكسب اد ايه انما حتموت
شحات على رأى المثل ٠٠ بيت النتاش مايعلاش ٠٠

عبيده : وبيت الفقرى هو اللى بيعلا

قطب : الفقرى مالوش بيت ٠٠ الفقرى له دكان ٠

عبيده : تعجبني صراحتك ٠٠ انت عارف انك فقرى ؟

قطب : عارف والحمد لله ٠٠ الحمد لله على الفقر والجدة
دى الجدة حلوه يا عبيده ٠٠ طبعاً انت ماتعرفهاش ٠

عبيده : انا سبتها لك ٠٠ كفاية واحد جدد فى الحنة ٠٠ حابى
انا وانت جددان ٠

قطب : دا ايه دا اللى انت لابسه ده ٠٠

عبيده : دا حنة حرير يابانى سكرونة معتبرة ٠٠ ناعمة مش كده

قطب : يا حلوة ٠٠ دى بتجيب طراوة فى الصيف دى يا عبيده ٠

عبيده : بتجيب دهب يا قطب ٠٠ بحتة زى دى تجيب دهب ٠٠

قطب : بقى لو لبست حنة زى دى اجيب دهب ٠٠ مش معقول
٠٠ لازم معاها حاجة تانى ٠

عبيده : حاجة ايه اللى قصدك فيها ؟

قطب : انت عارف ٠٠ وبطل كلام فارغ بقى ٠٠ ولع سيجارة ٠

عبيده : هيه سيرة ، انت مدخنة ، بس عمال تقولى بشرفى ،
بشرفى ٠٠ هيه الشحاتة شرف ؟

قطب : أحسن ماعمل حاجة تانى ، ولع ولع ٠٠

عبيده : خد ، والله انت ماتستاهلها ٠

قطب : دنا صاحب عيال ياد يا عبيده ، ابو بنات ، وابو البنات
شحات ٠

عبيده : ماكل الناس عندها بنات ٠٠ اشمعنى انت ٠٠

قطب : احنا فى زمن وحش ياد يا عبيده ٠٠ والبنات عار ٠٠ انا

هاقري فى مين ٠٠ انا عارف انت مخلوق من ايه ٠٠
مافيش حاجة عندك حرام ابدا ٠

عبيده : ازاي ٠٠ عندى حاجات حرام كثير ٠٠

قطب : انت تعرف الحرام ٠٠ والله ماتعرفه ٠٠ دا اللى علمك
صنعة المكوجية ٠٠ ظلمك ٠٠ انت كنت لازم تطلع صبى

محامى ٠٠ انا حادوش دماغى معاك ليه ٠٠ انا سايبك

الحتة وماشى *

عبده : المركب اللى تودى ٠٠

عبده : (صائحا) قطب ٠٠ يامعلم قطب ٠٠ يا قطب *

ام بكريه : (من الداخل) مين *

عبده : دنا عبده يا ام بكريه *

ام بكريه : خير ياسى عبده ٠٠ عاوز حاجة *

عبده : هو المعلم قطب مش هنا ٠٠

ام بكريه : لا والنبي ياسى عبده ٠٠ دا خرج من شوية *

عبده : آه * طيب ٠٠ هيه بكريه هنا *

ام بكريه : عاوزها فى حاجة ياسى عبده *

عبده : لا ابدا ٠٠ انا بقول يعنى يمكن تكون عارفه ابوها

راح فين *

ام بكريه : ابدا دى بكريه حتى نايمة ٠٠

عبده : نايمة ٠٠ حد ينام لدلوقت ٠٠ دى خم نوم قوى ٠٠

ام بكريه : عاوزها فى حاجة ياسى عبده اصحبها لك *

عبده : ابدا (بعد فترة) هيه نايمة قوى يعنى *

ام بكريه : ابدا ٠٠ همه العيال الصغيرة دول بيناموا ٠٠ بت

يا بكريه ٠٠ يا بكريه *

عبده : سيببها يا ام بكريه ٠٠ سيببها نايمة ٠٠ نامى يا بكريه

نامى ٠٠ نامى يا بكريه *

ام بكريه : تنام ايه بلا دلح ٠٠ اتفضل اقعد ياسى عبده ٠٠ اعملك

شاي *

عبده : يا ام بكريه ٠٠ مالوش لازمة *

ام بكريه : انا اعملك شاي ٠٠ بس يارب الاقى شاي *

عبده : انت لسه هتدورى ٠٠ خدى ٠٠ ربع جنيه ايه هاتلنا شاي

وسكر *

ام بكريه : ربع جنيه ياسى عبده ٠٠ اجيب بيه كاه ؟

عبده : كله ٠٠ هاتى من على الترمای ٠٠ التراجسل اللى على

الترمای بببيع شاي حلو قوى *

ام بكريه : طب والنبي تخلى بالك لحد ماخطف رجلى اجيب الشاي

عبده : بكريه ٠٠ بكريه *

بكرية : (من الداخل) ايوه يامه *

عبده : انا مش امك ولا حاجة .. انا عبده يا حبيبتي *

بكرية : ماله عبده يا امه *

عبده : بكرية .. بكرية .. حبيبتي .. انا بحبك قوى يا بكرية

.. خدى .. خدى يا بكرية .. خدى الخمسة جنيه دى

يا بكرية .. اصحى يا حبيبتي .. غطى رجلك يا حلالة

رجلك يا بكرية .. سبحان الخلاق العظيم .. غطى

يا حبيبتي غطى .. يا ميت حلالة ..

بكرية : ماتروحى انت تجيبى حلالة والا جيبى جبنة .. انا

مانمش .. الله ..

عبده : انا عبده يا حبيبتي .. انا عبده *

بكرية : مين .. عم عبده ..

عبده : ما قلنا بلاش عم نيلة دى .. يا حلالتك يا بكرية انا

ماكنتش فاهم انك حلوة كده .. خدى الخمسة جنيه دول

يا حبيبتي *

بكرية : عاوزنى اجبك ايه يا عم عبده *

عبده : تجيبى ايه وبتاع ايه .. دول بتوعك يا بكرية .. دول

علشانك يا حبيبتي *

بكرية : امال فين ابويا يا عم عبده ؟

عبده : ماقلنا بلاش عم نيلة دى ..

بكرية : وامى راحت فين *

عبده : ابوكى خرج .. وامك راحت لحد شارع الترامى ..

بقولك ايه يا بكرية انا عاوز اجيب لك فستان حرير *

بكرية : صحيح يا عم عبده ..

عبده : ماقلنا بلاش عم نيلة دى .. قولى يا عبده .. قوليلى

يا عبوده .. قولى اى حاجة يا قطقوطة ..

(طرقة قبلة ثم قبلة)

كرية : ايه دا يا عم عبده (طرقة قلم) .. (ثم طرقة قلم)

شودة : (بدهشة) مين .. عبده .. انت كنت بايت عند قطب

والا ايه ..

عبده : عم شنودة .. ازيك يا عم شنودة .. هوه قطب فين ؟

- شَنُودَة : قطب فين ؟ أنا اللي أسالك والا انت .
عبيده : انت شفته يا عم شَنُودَة .
شَنُودَة : انت جرا حاجة فى عقلك ياد يا عبده .
عبيده : لا أبدا يا عم شَنُودَة .. لا أبدا .. بس .. أنا كنت جوه
باشوف ايه الحكاية ؟
شَنُودَة : ماله قطب ، عيان والا ايه ..
(يتقدم نحو دكان قطب)
عبيده : (وهو يجذبه من ملابسه) سخن قوى يا عم شَنُودَة ..
فرن ..
شَنُودَة : ببشكى من ايه مسكين .. الله .. لكن انت وشك مزروود
كده ليه ؟
عبيده : اصله صعب على قوى يا عم شَنُودَة .. بقولك فرن .
شَنُودَة : المجد لله فى الاعالى .. صاحب عيال مسكين .
عبيده : انت رايح فين بس يا عم شَنُودَة .
شَنُودَة : أشوف الراجل لا يجراله حاجة يا عبده ..
عبيده : بس استنى دلوقت ماتخشش .
شَنُودَة : هوه فيه مين عنده يا عبده .
شَنُودَة : دا بكرية بتعيط يا عبده .. ربنا يشفيك يا قطب .. اوعى
يا عبده كده .. اما اشوف الراجل دا ماله زى العلقه كده
شَنُودَة : سلامتك يا قطب .. ألف سلامة .
بكرية : عاوز ايه انت راخر .
شَنُودَة : قطب فين يابنتى .
بكرية : قطب دا ايه يادلعدى .. مانت عارف انه خرج .. مش
عيب كده تبقى راجل شايب وعايب ..
شَنُودَة : انت اتجننتى يابت يا بكرية والا ايه ؟
بكرية : والنبي تخرج كده بلاش مسخرة .. هوه احنا حيطة
مايله والا ايه يادلعدى ..
شَنُودَة : أبوكى مش عيان يابت ..
بكرية : انشالله انت واللى يكرهونا .. عيان .. الهى تعيا ماتقوم
شَنُودَة : اخص عليكى عديمة التربية .. الله يخرب بيتك يا عبده

بكرية : عبده دا ايه راخر يادلعدى .. احفظ أدبك احسنك يا عم

شنودة .. هوه احنا من بتوع عبده والا ايه .. آل عبده

آل .. انجر اخرج بقولك انت ايه اللى مدحك هنا ..

شنودة : اخص .. اخص .. وحياة العذرا القيامة لتقوم ..

ام بكرية : خير يا عم شنودة .. ايه الحكاية ..

شنودة : ام بكرية .. انت فين .. البت بكرية تشتمنى وتلعن قرمة

جدودى .. يخلصك يعنى ..

أم بكرية : تشتمك .. قطع لسانها من جوه .. ايه يابت يا بكرية

ايه الحكاية .. انت سايبه يابت .. ماحدش عارف يربيكى

يا بت ..

بكرية : ماهو اللى داخل على وانا عريانة يامه ..

ام بكرية : داخل عليكى وانت عريانة .. تخش عليها وهيه عريانة

ازاى يا عم شنودة .. دا يصح منك ده .. بقى بدل ماتستر

عليها يا عم شنودة ..

شنودة : انت برضه صدقتى البت يا أم بكرية .. صدقتى البت

ام بكرية : يعنى حتكذب عليك ليه يا عم شنودة .. حتدعى عليك ليه

.. وهيه العيلة دى تعرف الكذب ..

شنودة : كده .. طب خلاص يا أم بكرية .. خلاص .. وحياة

العذرا القيامة لتقوم .. وحياة العذرا القيامة لتقوم ..

ام بكرية : تقوم والا ماتقوم .. احنا ناس فى حالنا .. مانحبش

المسخرة وقلة الأدب ابدا ..

شنودة : خلاص بقى يا ست ام بكرية حقك على .. حقك على يا ست

.. وحياة العذرا .. لتقوم القيامة .. الواد عبده اقول

له الراجل عيان .. يقوللى دا فرن .. اتارى فرن جوه

صحيح ..

ام بكرية : فرن يلمك .. راجل ناقص ..

شنودة : كده .. طب خلاص يا أم بكرية .. خلاص .. وحياة

العذرا القيامة متقوم صحيح .. ياسلام دا الدنيا

اتشقلب حالها .. انما أنا راجل لطح صحيح .. ايه اللى

مدخلنى جوه .. لكن تقول ايه للنصيب .. نصيب (يشرب)

لكن كله كوم وحكاية فرن دى كوم .. فرن آل .. (يضحك)

فرن .. بقى فرن يا عبده فرن ..

الجارحى : عاوز حاجة م الفرن يا عم شنودة ..

- شنودة :** فرن لما يحرق عضعك ٠٠ انت هتتك بهيم طول عمرك ٠٠
- الجارجى :** هوه انتو كلكو تشتمونى يا عم شنودة ٠٠ مش انت اللى بتقول القرن ٠
- شنودة :** ماهى لفران كثير ياد ياجارجى ٠
- الجارجى :** ايوه مانى عارف ٠٠ فيه فرن افرنجى بتاع العيش الفينو ٠٠ وفرن بلدى بتاعنا ٠
- شنودة :** لا وفيه فرن عبده ٠
- الجارجى :** هوه عبده فتح فرن ٠٠ انتو هاتجننونى ليه ٠٠ مرة تقولوا فتح فرارجى ٠٠ ومرة تقولوا فتح غرن ٠٠ انا عقلى هيرج منى يا جدعان ٠٠
- شنودة :** ماهو البغل اللى زيك مش ممكن يفهم ابدا ٠٠ عارف ياد يا جارجى انت اغبى م البغل ٠
- الجارجى :** وبعدين معاك يا عم شنودة ٠٠ انت مش حتبطل البتاع الهباب اللى انت بتشربه ده ٠٠ حى يشرب على الريق كده
- شنودة :** مش بقولك انت بغل ٠٠ انت بتاخذ كام فى الجيش المرابط ياواد ٠
- الجارجى :** ستين فضة واكل واشرب ٠
- شنودة :** يعنى بتشرب العرقى ياخى ٠٠ مش بتشرب م الجردل ٠٠
- الجارجى :** وياريت بس يا عم شنودة ٠٠ طب وحياة عم شنودة اكل الجيش ده بقالى تلت تيام ماصدعته ٠
- شنودة :** روح ياواد يا جارجى شوف انت كنت رايح فين ٠٠ روح يابنى روح خليك لطخ ٠٠ كده احسنك ٠
- الجارجى :** وهو انا لطخ يا عم شنودة ٠
- شنودة :** لا العفو (انا اللى لطخ ٠٠ بالذمة انا لطخ صحيح ٠٠ آل فرن آل ٠٠ الا قرن ده ٠٠
- الجارجى :** انت برضه عاوز تمخولنى وتقول فرن ٠
- شنودة :** انما فرن ايه ياواد يا جارجى ٠٠ فرن مظبوط ٠٠
- الجارجى :** عبده عامل قرن جوه صحيح يا عم شنودة ٠
- شنودة :** مانتش مصدقنى خش شوف ٠٠

- الجارحي :** بقى ياخواتى حته الدكانة دى ٠٠ تنفع الواحد يفتح فيها
فرن ٠٠
- شنفودة :** افران م النوع ده آه ٠ دا الواحد يفتح ثلاثين ذرن فى
دكانة اصغر من دى ٠
- الجارحي :** امال مافيش ريحة خبيز فى الدكانة ليه ٠
- شنفودة :** فيه ريحة طيبخ ٠
- الجارحي :** وقطب شركة ويا عبده فى الفرن ٠
- شنفودة :** ايوه ٠٠ بس قطب مايعرفش ياد يا جارحي ٠
- الجارحي :** قطب مايعرفش ان دكانه فيها فرن ٠٠ بقى دا اسمه كلام
٠٠ حد يفتح فرن فى دكان واحد ٠٠ والواحد دا
مايعرفش ٠
- الجارحي :** (مذعورا) آى ٠ دا مين ده ٠٠
- جرا ايه يا قطب ٠٠ هو انا ملطشة والا ايه ٠
- قطب :** يركبك الهوا يابن الهرمة ٠
- شنفودة :** دا غلبان يا قطب سيبه ٠
- قطب :** غلبان ايه ده بكره يسبب الجيش الم رابط ويدخل البوليس
ويبقى حكمدار داورية قد الدنيا ويعمل علينا قمع ٠
- الجارحي :** هو مين دا اللي يخش البوليس ٠٠ والنبي دا القعدة
على حرف الترعة فى بلدنا تسوى مداين ٠٠ ياما نفسى
يا جدعان اقعد ع المصطبة بالليل فى القمرية واكل بتاو
ناشف بمش وجبنة ٠
- قطب :** بقى وحشك المش قوى يا جارحي ٠
- الجارحي :** بتقول فيها ٠٠ طب والقرآن الكريم وحشنى ٠
- شنفودة :** وش فقر ٠٠ (لقطب) انت جاي منين نلوقت يا قطب ٠
- قطب :** رحت اجيپ شوية بضاعة ٠٠ الواد بتاع البيقاله مريضيش
يدينى ٠٠ عاوز ضامن آل ٠٠ جيت آخذ معايا الواد عبده
تعرفش الواد عبده راح فين ٠
- شنفودة :** لا والله يا قطب ٠٠
- الجارحي :** يمكن يكون فى الفرن ٠٠ خش شوفه ٠٠ مش عيب يبقى
عبده فاتح فرن جوه ولا تعرفش ٠

- قطب : قرن ؟ قرن ايه يابن العبيطة •
الجارحي : عم شنودة يحكيك •• احكيه يا عم شنودة ••
شنودة : ياواد بطل عبط وروح فى داهية ••
الجارحي : والنبي تحكيه •
شنودة : ياواد روح لضيع وشك (يهدده بالزجاجة) •
الجارحي : (وهو يفر من المسرح) والنبي تحكيه •
قطب : قرن ايه اللي بيقول عليه الواد الجارحي •
شنودة : دا واد مخبوط فى عقله ماتخلوش على كلام •
قطب : طيب ماتيجى معايا انت يا عم شنودة عند الواد النبال
تضمنى ••
شنودة : ياللا يا قطب •• ولو ان الواد عارف ان غراب ضمن
حداية •
(يخرجان)
ام بكريه : والنبي ان جبتى سيرة لبوكى لأكسر رقبتك •• هو الجسدع
عمل فيكى ايه كلك •• ولا كلك ••
بكريه : (وهى تبكى) وليه يخش على وانا نايمه ••
ام بكريه : وفيها ايه يعنى •• راجل اد ابوكى ولا يعنى السفيرة
عزيزة دخل عليها •• يا شيخة اتوكسى اتوكسى كده ••
وانت موكوسة من دون البنات •
بكريه : ويوسنى ليه وانا نايمه •
ام بكريه : يعنى باس البرنسيصة •• والنبي دا الكلب الجربان
ما يستعنى ييوسك •
بكريه : وساب الفلوس دى جنبى ليه •• خمسة جنيه سايبها لى
عشان ايه •
ام بكريه : راجل طيب •• افتكرت بنى أدمه •• وهو انت تسوى
قرش صاغ •• وانت ماتسويش مليم أحمر •• جتو خيبة
اللى يشتريكى بقرش تعريفة •• مش عاجباكى الفلوس
هاتبها اوعى كده •• اوعى ايدك هاتى الفلوس •• يعنى
مكلبشة عليها زى الحداية ••
بكريه : سيبى ايدى •• يالله •

ام بكرية : اشمعنى دى عرفتيها ٠٠ طب مانت مش عاجبك ٠٠ ولا
انت عارفة الخمسة جنيه ٠٠ والعشرة جنيه ٠٠ ماتقومي
تغسلى وشك كده وتغيرى زى البنات ٠٠ انت مش حاسة
بروحك يابت *

بكـرية : والله العظيم لاقول لابويا *

ام بكرية : طب قوليله كده * شوفى انا حاعمل ايه ٠٠ وحياة سيدنا
النبي لاجيبها فوق دماغك *

بكـرية : وحياة النبي لاقوله *

ام بكرية : (صارخة) يابت ماتخلينيش اكلك بسنانى ٠٠

بكـرية : (باكية) الله ٠٠ اوعى شعرى ماتشيديش (تبكى) *

عبيده : ايه الاحكاية جرالكم ايه ٠٠ هيه بكرية لسة صغيرة عشان
تنضرب كده يا ست أم بكرية ٠٠ دى بقت باسم الله ماشاء
الله عروسة *

ام بكرية : عروسة ايه عروسة لما تاكل مصارينها ٠٠ دى مافيش عقل
فى دماغها ياسى عبده *

عبيده : ازاي بقى ٠٠ دى ست العاقلين كلهم *

ام بكرية : سامعة لللى تنوكسى عمك عبده بيقول عليكى ايه ؟ ده انا
ياخويا زى ما اكون عدوتها ٠٠ مش عاوزة تعرف
مصلحتها فين ابدأ *

عبيده : معلش يا ست أم بكرية ٠٠ انا ح اعقلها *

ام بكرية : ياريت ياسى عبده ٠٠ ياريت *

عبيده : اسمعى يا ست أم بكرية ٠٠ انا سبت لبكرية خمسة جنيه
ساعة انتى مارحتى تجيبى الشاى ٠٠

ام بكرية : ايوه يا اخويا انا خدتهم منها ٠٠ هى دى تعرف تشيل
فلوس ياسى عبده ٠٠

عبيده : وتشيلهم ليه ٠٠ امسكى كمان خمسة جنيه اهم ٠٠
وتخطفى رجليك تجيبى لها فستان كويس كده وجزمة
وشنطة كمان انا عاوزها تبقى سنيرة خالص ٠٠

ام بكرية : طيب من عينى ياسى عبده ٠٠ بس عقلها انت ياسى عبده
على ما اجيب الحاجات واجى ٠٠ (تنصرف)

عبيده : اسمعى يا بكرية ٠٠

- بكرية :** (تخرج) نعم •
- عبده :** نعمين عليك يا جميل •• عاوزك تدورى قوى • جمعة
كمان حتبقي اشيك واحدة فى الحنة ••
- بكرية :** وعاوزنى اعمل ايه يا عم عبده •
- عبده :** ماقلنا بلاش عم نيلة دى ••
- بكرية :** طيب •• عاوزنى اعمل ايه ياسى عبده ؟
- عبده :** شوفى ياست •• ولا حتعملى حاجة ولا محتاجة ••
الحكاية كلها بسيطة •• انت عارفة ان الانجليز دول عبط
•• يعنى الواحد يقدر ياكل مخهم •• المشوار لحد عندهم
بتاع عشرة جنيه ••
- بكرية :** (منزعجة) لهوانت عاوزنى اروح عند الانجليز ياسى عبده
- عبده :** وانت حتروحي ليه •• هعه اللي هيجولك •
- بكرية :** هيجولى هنا فى الدكان ؟
- عبده :** لا •• حيجوا هنا قريب منك •• الحاجات دى كلها
حدبرها أنا •
- بكرية :** لا ياسى عبده •• أخاف •• ما أقدرش ••
- عبده :** شوف العبط •• بتاع البنات •• هوه انت حتروحي
لوحدهك ليه •• هو مافيش وراكى رجالة •• انا رجلى
على رجلك •• انت فاهمة أنا اسسيبك تروحي لوحدهك
للانجليز ••
- بكرية :** لا أنا مارحش للانجليز ياسى عبده ••
- عبده :** وانت حتروحي يعنى تعملى ايه •• دنت حتضحكى عليهم
•• دا ريك ببسبب الأسباب •• ناس عبط زى دول ••
لازم ناس ناصحة تاكلهم •
- بكرية :** واما ابويا يعرف ياسى عبده •
- عبده :** ابوكى •• يعنى أبوكى ماشاء الله قوى •
- بكرية :** لا متغلطش امال فى ابويا ياسى عبده •
- عبده :** مش قصدى حاجة •• قصدى يعنى ابوكى مش هيعرف
أى حاجة ••
- بكرية :** طب افرض عرف ياسى عبده ••
- عبده :** مش هيعرف حاجة عمره •• احلفك بايه عشان تصدقى
•• وشرفى مايعرف حاجة ••

- بكـرية : يعنى ابويا مش حيعرف ..
- عبـده : ابدأ .. النهارده بالليل فيه انجليزى مريش قوى عاوزين
نضحك عليه انا وانت *
- بكـرية : بس حنرحلوا فين يا عبده ..
- عبـده : اهو دا اللى بفكر فيه .. خشى انتى اغسلى وشك كده
ووضبى نفسك على امك ما تيجى .. ماتشغلش بالك انت
خالص شوفى نفسك بس وشوفى صحتك .. وانا على
الباقى .. كل شىء حندبره يا جميل *
- الجـارحى : واد يا عبده .. عبده .. انت بصحيح ياواد فتحت قرن *
- عبـده : آه .. عاوز تخبز حاجة *
- الجـارحى : جد يا عبده فتحت قرن *
- عبـده : (يقوم بتهويشه) ماتبطل عبط يابن العبيطة *
- الجـارحى : والنهى عم شنودة قاللى النهارده الصبح انك فتحت قرن
فى دكان قطب *
- عبـده : مظبوط ياواد يا جارحى ..
- الجـارحى : قرن بحق وحقيق يا عبده .. قرن كبير يعنى *
- عبـده : كبير قوى .. اكبر من عقلك .. حاكم انت عليك عقل
كبير بشكل *
- الجـارحى : انت بتتمالس على .. طب هوه انا لو ماكنش عقلى كبير
كانت الحكومة مسكتنى مخبأ *
- عبـده : عندك حق .. فكرتنى ياواد يا جارحى اسمع .. المخبأ
فاضى ..
- الجـارحى : ايه فاضى يعنى ؟
- عبـده : يعنى فيه حد ؟
- الجـارحى : حيكون فيه مين ؟ مادام ما فيش غارات يبقى فاضى ..
ساعة الغارة يتملى لعينه *
- عبـده : اصل انا محتاج المخبأ الليلاى شوية *
- الجـارحى : ليه هوه فيه غارة الليلاى ..
- عبـده : مش عشانى انا يا جارحى .. اسمع .. ولع ..
- الجـارحى : ايوه ربنا يجبر بخاطرك .. هات ..

- عبيده : اسمع يا واد يا جارحي ٠٠ فيه واحد انجليزى صاحبي
عاوز يستخبي فى المخبأ عندك الليلادى ٠
- الجارحي : الانجليزى اللى حيستخبي ؟
- عبيده : آه ٠٠ عندك مانع ٠٠
- الجارحي : والانجليزى حيستخبي من ايه ؟
- عبيده : من ايه ازاي يامغفل ٠٠ مش فيه حرب ٠
- الجارحي : ايوه الحرب شغالة ٠
- عبيده : طب هو حيستخبي من الألمان ٠
- الجارحي : والألمان جم هنا يا عبده ٠
- عبيده : يا واد الألمان ماهم طول النهار والليل فى الجو هيه
طياراتهم بتطل مشى ٠
- الجارحي : حق طيارات الألمان شغالة ليل ونهار ٠
- عبيده : طب مانت عارف ايه ٠
- الجارحي : ايوه ما انا عارف كل حاجة ٠
- عبيده : اسمع ٠٠ الانجليزى ده حيستخبي ساعة واحدة ٠٠
وحيفك جنيته ٠
- الجارحي : جنيته يا عبده وحته واحدة ٠
- عبيده : آه ٠٠ جنيته أخضر ٠
- الجارحي : طب انشا الله يستخبي على طول ٠٠ والجنيته انت تسعين
قرش وأنا بريزة ٠
- عبيده : لاحد الله ٠٠ انا مش عاوز حاجة من الجنيته ٠٠ والجنيته
دا حقا انت غفير المخبأ مش أنا ٠
- الجارحي : وماله لما ناكل اللقمة سوا يا عبده ٠
- عبيده : لا ياعم انت حتاخذ الجنيته لوحدهك ٠
- الجارحي : والانجليزى دا فين ؟
- عبيده : حيبجي العشا ٠٠ روح وضب نفسك انت ٠٠ وماتخليش
مخلوق يقف عند باب المخبأ ٠٠ فاهم ٠٠
- الجارحي : ولا سريخ ابن يومين سيكون هناك ٠٠
- عبيده : وريني شطارتك بقى يا واد يا جارحي ٠
- الجارحي : أنا حاتربط هناك من دلوقتي مش قايم ٠

- عبده : (بصوت عال) خد ياواد يا جارحى *
- الجارحى : (يعود مسرعا) ايوه يا عم عبده *
- عبده : خد ياد .. رزقك (يضرب يده فى جيبه) خد .. انت ويختك .. ياللا يا عم
- الجارحى : (ناظرا فى الورقة) ايه دى يا عم عبده .. ربع جنيه دى *
- عبده : ربع جنيه ايه يابن العبيطة .. ده جنيه بحاله ..
- الجارحى : هوه ده الجنيه يا عم .. جنيه حته واحدة .. يشتري قيراط فى بلدنا ودا عشان ايه يا عم عبده ..
- عبده : تحت الحساب .. بعد كده نتحاسب ..
- الجارحى : واحنا حنتحاسب يعنى بينا التجارة *
- عبده : ياواد ماهو دا كلام الانجليز .. كل انجليزى حيستخبي عندك بخمسين صاغ .. ودا مقدم .. مالكش دعوة انت .. انا بعدين حاحاسب القيادة الانجليزى
- الجارحى : بس يا عبده (يقف مترددا) *
- عبده : ياواد ماتيقاش بجم .. انا عاوزك تقلع الخيش اللي لابسه ده وتلبس حته سكروته .. وتاكلن لحمة مشوية بدل الطعمية اللي قطعت قلبك دى .. تعالى معايا إما افطرك .. (الجارحى ينصرف وعبده ينظر نحوه فى سرور)
- (يدخل الى المسرح سمير ثم فرملة تاكسى وصوت هدية من الكواليس تنادى)
- هدية : سمير .. سمير .. تلحق به الى المسرح)
- سمير : (بغضب) عاوزه منى ايه يا هدية *
- هدية : انت زعلت يا سمير ؟ بقى انا باعمل دا كله عشان خاطرك
- سمير : عشان خاطرى انا بترقصى مع العساكر الانجليز وتسكرى معاها عشان خاطرى *
- هدية : انا مش باعمل كده عشان نحوش قرشين ونعيش كويس يا سمير *
- سمير : الله الغنى عن القرشين اللي م النوع ده .. دول مايعيشوش كويس يا هدية دول ذل وهم وغم ازلى ..
- هدية : يعنى عاجبك عيشة قطب المهيبه يا سمير ، عاجبك شنودة اللي مش لاقى يفطر *

سمير : والله الواحد ياكل تراب ويعيش راسه مرفوعة أحسن .
هدية : بقى مش عاجبك يا سمير الفلوس بقت تجرى فى ايدك
وما انتش عارف لها اول من آخر .. عاوز ترجع تعيش فى
الفقر اللى فى الحقة دى .. ياللا يا سمير ترجع ماييقاش
عقلك فارغ ..

سمير : انا مش راجع معاكى يا هدية .. والنبي لو كلت لحمه
محمره ليل مع نهار مانا راجع الصالة تانى ولا شاربلها
ميه .. انا هاقعد فى الطين هنا ومش راجع .. هافرش
خيشة وانام ع الرصيف جنب قطب ومش راجع تانى .
(يسمع صوت نغير السيارة)

هدية : ياسمير ياللا أحسن التاكسى قلق ..

سمير : لا ارجعى انت للتاكسى .. انا راجع بيتنا موتورجل ..
هو احنا بتوع تاكسيات يا هدية .

هدية : يا سمير ياللا بينا بعدين ترجع تنسدم .

سمير : ارجع اروح فين .. دنا كنت مخبوط فى عقلى يوم
ماروحت معاكى .
(صوت النغير)

هدية : يعنى مش عاوز ترجع .

سمير : لا روحى انت مع السلامة .. روحى انت يا هدية ..
(ينصرف)

هدية : طيب غور فى داهية (بعصبية) غور ياوش الفقر .
(تستدير عائدة الى السيارة ويسمع صوتها وتنصرف)

عبيده : يظهر ان الجو حايروق ويبقى آخر مملكة .

(سقار)

الفصل الثاني

المشهد الأول

تجرى احداث هذا المشهد فى الصباح الباكر من أحد أيام عام ١٩٤٣ • • تفتح الستار على بكريه فى ملابس عصرية جميلة وفى يدها حقيبة فاخرة • وتصبغ وجهها بالمساحيق • • تدخل بكريه المسرح فى طريقها الى الدكان تتلفت خلفها فى حذر وتراقب الطريق وهى شديدة القلق قبل أن تدخل الى الدكان يبرز « سمير » الذى يكون مختبئاً فى أحد الزوايا ويناديه بصوت عال :

سمير : بكريه •

بكريه : (مذعورة) مين • • بسم الله الرحمن الرحيم (تتلفت خلفها)

سمير : انا سمير • • ايه خوفتى • • بتخافى يا بكريه •

بكريه : (بغضب) سمير • • عاوز منى ايه •

سمير : كنتى فىن لحد دلوقت ؟

بكريه : وانت مالك • • كنت من بقيت اهلى والا ايه •

سمير : بقى مش عيب عليكى يا بكريه • • انت بنت الناس الطيبين

• • انت بنت المعلم قطب • • اطيب راجل فى الحته • •

- بكرية** : انت عاوز منى ايه دلوقت .. مالك رمالى .
- سمير** : وبرضه ليكى عين تزغقلى .. وبتهبى فيه يا بكرية .
- بكرية** : ماليش عين ليه يادلعدى .
- سمير** : طب وحياة ربنا أنا لو معايا سيكينة لادبلك واشرب من دمك
- بكرية** : مايحكمش .. قتلت كام واحدة يادلعدى والنبي تروح كده تشوفلك شغلة .
- سمير** : بقى الواد النتن عبده المكوجى يجبر رجلك ..
- بكرية** : ماله عبده المكوجى يادلعدى .. صايع وضايع زيك ..
- قاعد طول النهار جنب الحيط لا شغلة ولا مشغلة ..
- والنبي مانتش مكسوف من نفسك .
- سمير** : (بتهافت) يا بكرية عيب يا بكرية .. عيب تحطى راس ابوكى فى الطين .. اعقلى يا بكرية انا بحبك .. بحبك .
- بكرية** : (بسخرية) بتحبنى (تضحك) حبك برص .. والنبي تروح تشوفلك ترعة تغسل فيها قميصك المزيث ده ..
- سمير** : يعنى مش ناوية تتلمى يا بكرية .. مش ناوية تعقلى وتسيبك م المشى البطال ده .
- بكرية** : انت حتتجر تمشى من هنا والا ارقع بالصوت واخلى ابويا يطلع يشرب من دمك ..
- سمير** : كده يا بكرية .. طيب .. طيب يا بكرية .. انا وانت والزمن طويل .
- بكرية** : روح ياشيخ كده شوفلك موته قبل ما الموت يغلا ..
- سمير** : طيب يا بكرية بكره تقولى ياريت اللى جرى ماكان .. بكره تعيطى بدل الدموع دم يا بكرية .
- (يدخل شنودة)
- شنودة** : من اللى قاعد ده .. سمير .. داهية تاخذك .. يا واد قاعد كده ليه زى قرد قطع .
- سمير** : ياريتنا قرود يا عم شنودة .. هوه احنا حصلنا .
- شنودة** : ايه ياواد اللى راميك على الرصيف الصبح بدرى كده .
- سمير** : البت بكرية يا عم شنودة .. البت بكرية .
- شنودة** : مالها البت بكرية يابنى .. جرالها حاجة .
- سمير** : ياريت يا عم شنودة .. ياريتها ماتت .

- شنودة : (يقترب من سمير) ايه الحكاية يا بنى ماتفهمنى ..
- سمير : الواد عبده لف عقل البت وشغلها معاه ..
- شنودة : شغلها معاه .. شغلها معاه ايه يا بنى ..
- سمير : شغلها معاه فى المخبأ ..
- شنودة : مخبأ .. مخبأ ايه يا واد انت جراك حاجة .. هية بكرية خدوها الجهادية .
- سمير : جهادية ايه يا عم شنودة .. ما تفهمنى بقى .. بقى يعنى ماننش عارف عبده بيشغل ايه فى المخبأ .
- شنودة : يوه. يوه يوه يوه .. البت بكرية ..
- سمير : ايوه بكرية ..
- شنودة : بنت المعلم قطب ؟
- سمير : ايوه بنت المعلم قطب .
- شنودة : (يضرب كفا بكف) بنت الراجل الطيب الامير .. اللى طول عمره قاعد يحافظ على شرفه ..
- سمير : بنت الطيب الامير يا عم شنودة .
- شنودة : بسم الأب والابن والروح القدس .. استرها .. استرها .. استرها فى الايام السوداء دى .. دى علامات الآخرة يا بنى يا سمير .. علامات الآخرة بالحق يا بنى .. لكن قوللى انت مالك ومالها .. انت راخر عايز منها ايه .
- سمير : كنت عاوز اتجوزها .. يا عم شنودة .
- شنودة : انت يا واد مش بتحب البت هدية .
- سمير : آه .. لكن هدية .. ماشية فى سكة تانية خالص .
- شنودة : لكن يعنى لو رجعتك .. تتجوز مين فيهم .
- سمير : بينى وبينك يا عم شنودة .. اتجوز هدية .
- شنودة : يبقى نصيحتى . يا واد يا سمير تبعد عن البنت بكرية .. الله يسهل لعبيده لكن دى حكاية غبرة قسوى اللى انت بتحكيها دى .. البت بكرية .. بكرية بنت المعلم قطب اخص .. بالحق دى من علامات الآخرة ياد يا سمير .. (ينفض ويتجه الى الدكان)
- سمير : آخرة ايه بس اللى انت ماسكها لنا دى .. هو بقى قتيه آخر ولا اول .

شنودة : اخص على دى أيام .. اخص .. البت بكيرية • بنت
المعلم قطب .. اخص .. (يفتح الدكان) اخص •
اخص .. بنت المعلم قطب .. اخص على كده .. بنت
المعلم قطب .. بنت الراجل الطيب .. يا سلام ربنا ينهيها
على خير • بقى بنت الراجل الطيب بقت وزه .. الله
يخبيك يا عبده .. والواد الجارحى كمان الواد الفلاح
الحمش يعمل كده .. اخص عليك يا جارحى .. اخص •

الجارحى : يا عم شنودة .. الواد عبده فين •

شنودة : (ناظرا للخلف) مين الجارحى •

الجارحى : ايوه الجارحى يا عم شنودة •

شنودة : ايه ياواد الحاجات الحلوة دى اللى انت لابسها

• انت قتلت قتيل ياواد •

الجارحى : جلبية سكروته يا عم شنودة •

شنودة : (يتحسس الجلباب) انما دى طرية قوى ياواد يا جارحى

الجارحى : وماقتل قتيل ازاي يا عم شنودة .. هيه البلد دى تعرف

تقتل فرخة دا الواحد قبل ما يمك فى خناق الراجل يتلم

عليه ميت عسكرى .. هيه دى بلد الواحد يعمل فيها

راجل .. انت فكرت شوفنا خير بعد ماسينا بلانا

يا عم شنودة •

شنودة : انت ياواد مش كنت قتال قتلة فى بلدكو •

الجارحى : بلدنا شئ وهنا شئ تانى يا عم شنودة .. بلدنا الخير

فيها كثير لسه يا عم شنودة والواحد هناك يقتل القتيل

فى عز الضهر ولا من شاف ولا من درى .. انما هنا

وحياة سيدى المدبولى مافيه رجالة فى البلد دى يا عم

شنودة .. البلد دى كلها نسوان من غير مؤاخذه •

شنودة : وانت عملت مرة انت راخر ياد يا جارحى •

الجارحى : انى يا عم شنودة .. دنا راجل من ضهر راجل طول

عمرى .. غيرش على رأى المثل ان لقيت بلد بتعبد طور

حش واديله •

شنودة : وحشيت معاهم انت راخر ياواد ..

الجارحى : اعمل ايه يا عم شنودة •

- شنودة : وحشيت كتيز مع الواد عبده ٠٠
- الجارجى : وهو عبده بيحش راخر يا عم شنودة ٠
- شنودة : امال ياواد ٠٠ الواد عبده ده قائد كبير ٠٠ وانت كمان يا جارجى بكره تبقى قائد انت راخر ٠
- الجارجى : انا يا عم شنودة ابقى قائد ٠
- شنودة : امال ياواد ٠٠ مش لبست سكروته ياواد ٠٠ ماهيه السكروته دى من علامات القيادة ٠
- الجارجى : بقى انا بقيت قائد يا عم شنودة ؟ دى ماكانتش حته جلابية
- شنودة : بكره تلبس ياواد ٠٠ وتركب سنان دهب ٠٠ وساعات دهب ٠٠ بكره تبقى قائد ياواد بس اصبر ٠٠ انت دلوقتى وكيل قائد ٠٠ بكره تترقى بكره تترقى ياواد يا جارجى ٠
- الجارجى : يعنى الواحد لو كان له اجل يا عم شنودة ٠٠ يترقى باذن الله ؟ ٠٠
- شنودة : امال ٠٠ مش بيقولك ياواد يا جارجى ٠٠ من جد وجد ٠٠ انما قوللى ٠٠ هوه عبده فين ؟
- الجارجى : وهوه انا باشوفه يا عم شنودة ؟
- شنودة : الله ٠٠ هوه مش بيشتغل معاك فى المخبأ ٠٠
- الجارجى : ايوه بس انا مايارحش المخبأ دلوقتى ٠
- شنودة : مايترحش المخبأ ٠٠ امال بتشتغل معاه ازاي ؟
- الجارجى : انا مأجر له المخبأ بس ٠
- شنودة : مأجر له المخبأ ؟
- الجارجى : ايوه يا عم شنودة ٠٠ اهى شغلانه جديدة طلع فيها الواد عبده وربنا سهلها له ٠٠ ناصح الواد عبده ٠٠ والله يا عم شنودة ٠
- شنودة : ومأجر المخبأ منك بكتير يا جارجى ؟
- الجارجى : الانجليزى بخمسين قرش يا عم شنودة ٠٠
- شنودة : وهو بياجر للانجليز من الباطن يا جارجى ؟
- الجارجى : حد عارف بقى يا عم شنودة ٠٠ اهو رزق الهبل ع الجانين ٠
- شنودة : ويعملوا ايه الانجليز جوه فى المخبأ يا جارجى ٠

الجارحى : الواد عبده بيقول انهم بيستخبوا من الطيارات الانجليز
حاكم الانجليز خوافين ..

شنودة : اسمع ياواد يا جارحى .. اللى بيروحوا عندك مش
الانجليز الخافين لا .. اللى بيروح عندك الانجليز اللى
عاوزين ينسطوا .. وعارف مين بيروح معاهم كمان ..
.. ستات يا واد يا جارحى .

الجارحى : الله .. الله .. شوف الراجل .. يا خويا .. انت سكرت
وحتخرف ..

شنودة : انا ماسكرتش ياواد يا جارحى استنى .. استنى لما
أخلص كلامى .. وعارف مين كمان من الستات بيروح
مع الانجليز عندك المخبا بكريه بنت المعلم قطب ..
وعارف لو عرف المعلم قطب حيشرب من دمك .

الجارحى : عم شنودة .. انت سكران وبتلخ ..
شنودة : انت مش حاسس بنفسك ياواد يا جارحى .. ده انت
اللى سكران .

الجارحى : بقى انا اللى سكران ياخواتى ؟ انا اللى سكران ؟

شنودة : ايوه انت سكران ياواد يا جارحى .. ولانم تفوق ..
(يدخل شنودة الى دكانه)

الجارحى : (ينهض واقفا) بقى الواد عبده شغلنى معاه الشغلة
المهيبه دى .. (يتحسس الجلباب) ودا لبس الشغل
يا جدعان .. وكمان عبده بيشتغل بكريه معاه ؟ اتاريها
كانت واقفة معاه ليلة امبارح عند المخبا .. البت بكريه
كانت واقفة معاه وانا ماخدتش فى بالى .

الجارحى : يا عم قطب .. عم قطب ..

قطب : (يخرج من الدكان) ايه ياواد عاوز ايه ع الصبح .

الجارحى : صباح الخير الاول .

قطب : صباح الزفت على دماغك ..

الجارحى : ماتعرفش الواد عبده فين يا عم قطب .

قطب : حد قالك ان انا شايله فى جيبى .

الجارحى : طب وبكريه فين يا معلم قطب ..

قطب : وعاوز بكريه ليه .

- الجارحي : يمكن تعرف طريقه .
- قطب : وهيه بكريه من بقيت امله والا ايه . . . كلام ايه الفارغ
اللى بتقوله ده ياواد يا جارحي ازاي تجيب سيرة بكريه
على لسانك .
- الجارحي : ماهى كانت معاه عند المخبأ ليلة امبارح .
- قطب : عند المخبأ ؟ بكريه بنتى . . . بتعمل ايه مع عبده هناك ؟
- الجارحي : انا ايش عرفنى يا عم قطب . . . اهى كانت واقفة هناك .
- قطب : بت يا بكريه . . . بكريه .
- بكـرية : (من الداخـل) ايوه يابا .
- قطب : تعالى منا يا بت .
- بكـرية : نعم يابا .
- قطب : انت كنتى مع عبده امبارح عند المخبأ يابـت .
- بكـرية : انا يابا . . . ابدا والنبي يابا . . .
- قطب : امال الطور دا بيقول الكلام ده ليه ؟
- بكـرية : انا ماكنتش هناك ابدا والنبي يابا انا كنت هنا واسأل اُمى
- قطب : الساعة كام شفتها هناك ياد يا جارحي .
- الجارحي : ساعة المغربية .
- بكـرية : انا ماحططشى رجلى بره الدكان من ساعة الضهر والنبي
يابا . . . ماتسأل اُمى ماهى قدامك اُمى .
- الجارحي : مـثـ انـت اللى كنت واقفة مع عبده عند المخبأ ليلة امبارح
يا بكـرية ؟
- بكـرية : انا يا جارحي . . . انت شفتنى يا جارحي . . .
- الجارحي : ايوه انا شايفك يا بكريه . . .
- قطب : (فى ثورة) يعنى الجارحي حيكدب ليه ؟ مصلحته ايه
يعنى . . . انت بتستغفلينى . . .
- بكـرية : انا وحياة النبي ماخطيت بره الدكان يابا . . . ما تسأل
اُمى دهده .
- ام بكـرية : ايه الحكاية يادلعدى (تخرج من الدكان) .
- قطب : البت بكريه كانت فين امبارح بالليل يام بكريه .

ام بكريه : كانت فين ازاي ٠٠ كانت متلقية جمل من ابي
الحكاية يا معلم ٠

قطب : امال ازاي الجارحي شافها مع الواد عبده عند المخبأ ٠

ام بكريه : الجارحي ٠٠ الجارحي دا ايه ٠٠ ايه السكينة ياسي جارحي
٠٠ بقول شفت بكريه امبارح عند المخبأ ٠٠ انت شفت
بكريه يا أعمى يا جربان ٠٠ انت تقول على بكريه كده ٠٠
ياللى ينقص لسانك من اللؤلؤ ٠٠

الجارحي : ايوه شفت بكريه واقفة مع عبده عند المخبأ ياست ام بكريه

ام بكريه : اخرس قطع لسانك قال ست بكريه قال ٠٠ ست عفاريت
لما يركبوك انت واللى خلفوك ٠

الجارحي : وانا قلت حاجة ياست ام بكريه ٠٠ أنا اتخايلت فى واحدة
تشبه بكريه ٠

ام بكريه : اتخايلت ياللى ماتختشيش على عرضك ٠ روح انشالله
العالم تتخايل عليك وانت قاعد مكسح ٠٠ احنا عندنا
بنات تخرج تروح مخابىء ٠٠ ٠٠

الجارحي : طب أنا غلطان يا ست أم بكريه ٠

قطب : غلطان ازاي ياد يا جارحي ٠٠ هيه اعراض الناس كده
بالساهر يعنى والا ايه ٠

الجارحي : كانت ساعة مغربية يا عم قطب والعتب ع النظر ٠٠

قطب : أنا اللي يحيب سيرة بنتى ٠٠ اجيب كرشه ٠ عارف يعنى
ايه اجيب كرشه ٠٠

(يهم واقفا)

الجارحي : طب خلاص يا عم قطب حقك على أنا غلطان ٠

بكريه : (تبكى) آل شافنى آل ٠٠ دنا حتى ماحطتش رجلى بره
الدكان طول النهار امبارح ٠

قطب : خلاص يابت خشى جوه بلاش خوته وأنت روح انجر من
هنا احسن نهارك يبقى اسود ٠

ام بكريه : أنا مش حاسبيه النهاردة الصايح الضايح ده (تندفع
نحوه) تعالى هنا يادايخ ياللى مش لاقى تفطر (تضربه
تمسك فيه وتمزق جلبابه) ٠٠

الجارحي : عاجبك كده يا معلم قطب الجلابية السكرتة تقطعها لى
الجلابية السكرتة يا اخواتى الجلابية السكرتة يا عم

قطب ۰۰ دى حتى مش بتاعتنا ياناس ۰۰ الجلابية
السكروتة يا اخواتى ۰۰

(يدخل شنودة ومعه الحاج فهمى)

شنودة : خبر ايه ياناس الدوشة دى على الصبح .

قطب : سى الجارحى لبس سكروتة وعمل قمع .

الجارحى : الجلابية السكروتة يا عم شنودة قطعوهالى .

شنودة : يبقى مانتش مترقى فى سنك .

الجارحى : قطعوهالى يا عم شنودة .

شنودة : حد يقطع هدرم الشغل ياجارحى .

الجارحى : قطعتها ام بكريه ياعم شنودة .

شنودة : بس هو ايه اللى جرى يا جدعان .

ام بكريه : الواد اللى مايختشيش يا عم شنودة آل ايه شاف بكريه

عند المخبأ مع عبده المكوجى ۰۰

شنودة : كلام ايه ده يا جارحى ۰۰ مالکش حق .

الجارحى : انا اللى ماليش حق يا عم شنودة .

شنودة : طبعا مالکش حق ۰۰ وده كلام حد يقوله .

الجارحى : مش انت اللى قلت يا عم شنودة .

شنودة : انا ياواد قلت حاجة ؟ انت اتهبلت فى عقلك والا ايه .

قطب : انت اتجننت والا ايه يا واد .

الجارحى : انت يا عم شنودة مش قلت .

قطب : انجر ياواد من هنا بقى احسن أقوم الخبذلک وشك .

الجارحى : (منصرفا) طب ادينى انجريت يا عم قطب (لشنودة- بقى

انت ماقلتش يا عم شنودة ۰۰ ماقلتش ۰۰ ماقلتش ۰۰

(يختفى من المسرح)

شنودة : عجائب ۰۰ الحرب لخبطلت الناس والا ايه .

(يدخل الصاج فهمى)

قطب : اتفضل يا حاج فهمى ۰۰ خشى يابت يا بكريه اعملنا شأى

ام بكريه : لا انا اللى هاعملکوا الشأى بايدى الف نهار ابيض يا حاج

فهمى داحنا زارنا النبى النهاردة .

الحاج فهمى : الله يحفظك يا ست ام بكريه (لقطب) جأى فى كلمتين

وماشى ۰۰ انا اصلى من غير مؤاخذه عندى اوردر ولازم

اروحه .

ام بكريه : انت دايمًا مستعجل كده يا حاج فهمى .. والنبي لازم
تشرب الشاي *

الحاج فهمى : اللهم صلى عليه .. طيب نشرب الشاي من ايدك
الصلوة دى ..

(ينظر نحوها نظرات ذات مغزى)

قطب : ومستعجل ليه انشاء الله .. لازم وراك لوط عربيات
يا حاج فهمى *

الحاج فهمى : بصراحة .. ماخبيش عليك .. انا عندى شغل مش اد
كده انما لازم اعمله .. اصلى اديت كلمة وانا كلمتى
بريفكس يا معلم قطب .. لما ادى كلمة خلاص انجليزى *

قطب : حتشتري حاجة يعنى من غير مؤاخذه *

الحاج : ابدأ والله .. ماخبيش عليك انت مش غريب .. بقى انا
اصل معرفتى بالجيش الانجليزى ايه .. انت عارف انا
كنت مقرئ وبعدين فى أول الحرب الجماعة الهنادوة
اللى كانوا بيموتوا ويدفنهم فى الهرم .. كانوا بيحتاجوا
واحد يقرأ عليهم من غير مؤاخذه .. قول خدت انا
المقولة دى *

شنودة : مقالة ايه اللى انت خدتها *

الحاج : القراية ع الميتين بتوع الجيش *

قطب : يعنى اشتغلت مقال قراية *

الحاج : مطلبوط وبكتير .. الحة بحتة بعشرة *

قطب : حة ايه .. السورة بحتة بعشرة *

الحاج : لا من غير مؤاخذه الجثة .. الجثة بحتة بعشرة ..
ويجبوهم مكومين فى اشولة .. ميت حة ميتين حة ..
وربنا بيكرمنا ونكر عليهم سورة واحدة كلهم واهو يوم
نطلع بعشرين جنيه ويوم بخمسين .. ولما ربك يكون
فاتحها علينا قوى والحرب تحمى ايام بنطلع بميت جنيه
وميتين جنيه ..

شنودة : ولسه بتشتغل الشغلة دى *

الحاج : اعمل ايه .. اديت كلمة .. وانا لما ادى كلمة خلاص
وكمان اهو كل شئ بثوابه يا عم شنودة ..

شنودة : مفيش ميتين أقباط يا حاج فهمى •

الحاج : كتير •• انما الجيش عنده قول ولا ميت متين قسيس يا عم
شنودة •• لابسين ظابط زى الطباط تمام •• حكمة ربنا
ما تفرقش القسيس من الطباط •• وحكمة ربنا كمان ••
ما عندهمش فقها ظباط

شنودة : والله الجيش الانجليزى فرج ع العالم كلها •• الواد عبده
بيسسطهم وانت تدفنهم •

الحاج : (لشنودة) اهو كله بثوابه يا خواجه •• انت نويت والا
لا يا قطب •• الفلوس حاضرة فى جيبى أهى والحمد لله •
شنودة : ماتخلص بقى يا قطب الحاج فهمى له غرض ••
ماتصلجش بقى ••

قطب : أنا قلت مش هابيع يا عم شنودة •• الحاج فهمى لوجاى
على عيل من عيالى ادبجه لكن بيع مش مبيع ••
الحاج فهمى : ولو بيعت يا قطب انا عندى لك شغلة حلوة قوى •
شنودة : كمان ابسط يا عم •

قطب : شغلة ايه بقى من غير مؤاخذه •
الحاج : انا محتاج ملاحظ انفار زيك كده •• يعنى انت مش حتعمل
حاجة •• حتقعد ع الكرسي زى الباشنا طول النهار •

قطب : وبكام دى يا حاج فهمى •
الحاج : بعشرة جنيه فى الشهر يا معلم قطب •
قطب : ومن كام لكام الشغلة يا حاج فهمى ••
الحاج : من ستة الصبح لسته المغرب •

قطب : بقى عاوزنى اقعد من ستة الصبح لسته المغرب بعشرة
جنيه لا الله الغنى يا حاج •

شنودة : طب مانت قاعد ايه من ستة الصبح لسته الصبح تانى يوم
وببلاش يا قطب •• وفيها ايه لما تقعد من ستة الصبح لسته
المغرب وتاخذ عشرة جنيه •

قطب : ابقى انا راجل قاعد احافظ على شرفى طول عمرى يا عم
شنودة وبعدين اقبل شغلة طول النهار بعشرة جنيه •• لا
يا عم انا اكلها بدقة احسن •

شنودة : يا راجل ماتبقاش دماغك ناشقة •

قطب : وانا ايه اللى يقومنى الساعة ستة الصبح يا عم شنودة ..
بقى دا اسمه كلام .. مش شغال ..
الحاج : انت حر يا معلم قطب .. رأيك ايه بقى فى البيع ..

قطب : لا مش بايع يا حاج فهمى .. انا اكلها يملح واقعد فى
دكانى مبسوط اربعة وعشرين قيراط ..

الحاج : انت حر بقى يا معلم قطب .. انا كنت عاوز اشتري الشارع
اعمله سرايات واديني عملت اللى على والسلام ..
نستأجر احنا ..

قطب : تستأجر ازاي .. لازم تشرب الشاي ..
الحاج : (وهو ينهض) مالوش لزوم ..
ام بكريه : ياندامتى على فين يا حاج ..
الحاج : ورايا شغل يا ست ام بكريه ..

ام بكريه : وده يخلصك برضه يا حاج فهمى .. بقى عشان احنا فقرا
تقوم تقول مش عاوز تشرب الشاي ..

شنودة : اقعد بقى اشرب الشاي عشان خاطر ام بكريه ..
الحاج : هاتى ياست ام بكريه من ايد منعدهماش ..
ام بكريه : انت مش حتشوف شغلانة للمعلم قطب يا حاج ..

الحاج : ياميت صلاة الزين ياميت مليون حلوة .. دا يشتغل ملك
وحياة النبى ملك ايه ياخويا .. دا يشتغل كابتن .. حاكم
الكابتن فى الجيش الانجليزى ولا الملك

ام بكريه : والنبى تشوفلو شغلانة عندك ..

الحاج : انا خدام .. انا تحت الأمر بدل الشغلة شغلتين .. وبدل
الجنيه ميه .. المعلم قطب يستاهل ثقله دهب .. يستاهل
ثقله الماظ .. المعلم قطب انا خدامه انا عبد تحت رجله ..
يا ميت صلاة النبى على رجله ..

قطب : ايه هوه ده ..

الحاج : ايه يا معلم قطب .. وافقت .. ان كنت وافقت انا خدامك
انا فلوسى حاضرة والحمد لله ..

ام بكريه : ماتوافق يقى يا معلم قطب امال ..

شنودة : ماقلنا له يا ست شغلة بعشرة جنيه ماهوش راضى

أم بكريّة : ماهو راضى .. ماهوش راضى ازاي يا عم شنودة ..
صحيح الكلام ده يا معلم ..

قطب : ايوه حتتداخلى فى أمورى والا ايه ؟

أم بكريّة : امور ايه يا معلم .. انت امورك بقت عجب .. مش احسن
م اللطعة اللى ملطوعها دى .. هوه الشغل عيب يا جدهان
هوه الشغل تهمة .. العالم كلها بتشتغل .. وانت
حتفضل قاعد لحد مانموت م الجوع .

الحاج : معلش ياست أم بكريّة مسير الحال يتعدل ده ربك كبير
قوم بينا يا قطب ..

قطب : حاتقوم بينا على فين .

الحاج : على المخزن انا عندى فى المخزن شوية كراكيب كده مش
محتاجينها لامؤاخذة اللى ينفعك منها شيّة .

شنودة : قوم معاه يا قطب يمكن النحاس يغور .
(ينصرفان)

شنودة : وادى قطب راخر راح المخزن وحياة العذرا القيامة لتقوم
.. (يدخل دكانه ثم يعود بزجاجة)

(ينقطع الصوت داخل الدكان .. ويظهر عبده والجارحى
فى الشارع جليباب الجارحى لا يزال ممزقا)

عبده : مش عاجبك ياسى جارحى .. حاضر بلاش يا سيدى ..
انت وصلك كام لحد دلوقت .

الجارحى : وصلنى خمسة جنيه .. وسبعة يبقوا حداشر .

عبده : يبقوا اتناشر يا بجم .

الجارحى : وستين فضة خدتهم منك امبارح .

عبده : مش عاوز الستين فضة دول .. انا باتكلم ع النقدية
الكبيرة ..

الجارحى : ماخدتش غير كده ..

عبده : والجلابية نسيته ..

الجارحى : الجلابية ماتقطعت يا عبده .

عبده : استلمتها مقطعة .. والا انت اللى مقطعتها ..

الجارحى : يعنى عاوز تحسبها على كمان يا عبده .

عبده : امال انت فاهمها ايه .. سايبه .. بس ساعة الأخذ

زى المنشار ٠٠ وبعدين كده شاطر تقولى شرفى ٠٠ حد
مس شرفك ٠

الجارجى : ماهو عم شنودة اللى وزنى يا عبده ٠٠ انى كنت اعلم
حاجة ٠٠

عبده : عم شنودة متفاظ ٠٠ شايفك اتعدل حالك ٠٠ واترسمت
حتى سكروته وجزمة كاوتش ٠٠ والفلوس جريت فى ايدك
لازم يخرب عليك ٠٠ طب ايه رايك الأجر دكان شنودة ٠

الجارجى : والعمل ايه بقى يا عم عبده ٠٠
عبده : عاجبك تشتغل عاجبك ٠٠ مش عاجبك ٠٠ السبعتاشر
جنيه بكرة يكونوا عندى ٠٠

الجارجى : وانا هاجيب السبعتاشر جنيه منين يا عم عبده ٠
عبده : استلفهم ٠٠

الجارجى : استلفهم منين بس يا عم عبده ٠
عبده : استلفهم من شنودة مش هو اللى وزك ٠٠
الجارجى : وهو شنودة لاقى يفطر ٠

عبده : اعرف شغلك ٠٠ انت مش راجل جدع وبتخاف على
شرفك ٠٠ دبر نفسك ٠٠ (يدخل الدكانه) أو اشتكك
للمرابط ٠

الجارجى : وانا بس هاجيب الفلوس دى منين ٠٠ سبعتاشر جنيهه
مهماش سبعتاشر تعريفة دى مصيبة ايه دى بس يا ربى
(ناظرا للجلباب) وكمان الجلابية اتقطعت هييه عين
وصابتنا يا جدعان ٠٠ الله يخرب بيتك يا عم شنودة
خللا الفار لعب فى عبي ٠٠ والواد عبده شاطر فرارجى
وفتح فرن وقائد كمان ٠٠ بالزمة مش أجدع من المعلم
قطب اللى قاعد يقشر دره جنب الحيط ٠٠ لكن الراجل
شنودة خللا الفار لعب فى عبي ٠٠ تجيب الفلوس ياد
يا جارجى ولا تخليك فى السكروته ٠٠ دنا النهاردة فاطر
عسل نحل وعيش فينو ٠٠ بكرة هماغطر ملح ٠٠ حافظر
ملح يا جارجى ٠٠ والأكادة عم شنودة بيكذب ٠٠
شنودة : (واقفا على باب دكان قطب) انت بتكلم نفسك ياد يا جارجى
٠٠ اتجننت انت راخر ٠٠ السكروته جننتك ٠٠

الجارجى : عم شنودة ٠٠ مش عيب تكذب يا عم شنودة ٠٠

- شنودة : انا يا واد كدبت *
- الجارحي : انت مش قلتي ان عبده ماشى فى السكة البطالة **
- والبت بكريه معاه **
- شنودة : حصل ياواد ياجارحي **
- الجارحي : امال بتنكر ليه قدام المعلم قطب **
- شنودة : ياواد لازم تيسايس امورك ** هوه كل شىء يتقال ياواد **
- هتتك جلنف طول عمرك ** دول ناس شر وربنا يكفيننا
- شرهم ** لازم تيسايس امورك *
- الجارحي : يعنى اساييس امورى ** ياعم شنودة ** طب هات
- سيجارة يا عم شنودة *
- شنودة : وحياتك ما احتكم على نفس *
- الجارحي : طب هات قرش نشترى سيجارتين **
- شنودة : ولا معايا ريحتهم **
- الجارحي : يعنى اساييس امورى بقى ياجدعان ** عم عبده ** عم
- عبده **
- عبده : عاوز ايه يا جارحي **
- الجارحي : هات ثلاثة جنيه **
- عبده : ثلاثة جنيه بتوع ايه *
- الجارحي : مش على سبعتاشر *
- عبده : ايوه **
- الجارحي : طب هات ثلاثة يبقوا عشرين *
- عبده : يعنى انت حتجيب الفلوس بكره **
- الجارحي : هات بس يا عبده **
- عبده : مش اعرف هادفع فلوس ** عشان ايه **
- الجارحي : هات يا عبده تحت الحساب **
- عبده : يعنى حتخوت دماغى تانى **
- الجارحي : يا عبده هات امال ** سايس امورك **
- عبده : خد خمسة جنيه اهى **
- الجارحي : يعنى يبقوا كام **
- عبده : انت يعنى حتدفع **

الجارحي : بس اعرف حسابي يا عبده ..

عبده : الحساب يوم الحساب .. اسمع الساعة ثمانية عاوز
المخبأ نضيف .. وراعى أكل عيشك واغسل المخبأ كويس

الجارحي : وايه فائدة غسيله يا عبده .. ماهو برضه هيتنوا وسخ
.. هيتنوا وسخ برضه دا ولا بحر النيل ينضفه ..

(يتحسس رأسه)

الهى يخرّب بيتك يا عم ششودة ..

(سستار)

الفصل الثالث

نفس المنظر • بعد مضي زمن قصير من احداث المشهد
الثاني من الفصل الثاني • فترة الاستراحة فقط • • أى
ما يساوى العشرين دقيقة •
شنودة يجلس أمام دكانه • • خرمانا • • مؤنسا •
مهموما • • وكأنه يسبح فى عالم آخر •
يفيق فجأة بعد رفع الستار على صوت قطب يناديه :

قطب : يا شنودة • • ياشنودة • •

شنودة : مين ؟

قطب : أنا قطب تعالى • •

(قطب يدخل المسرح وقد حمل فى حجره اشياء كثيرة منها
علب مأكولات محفوظة)

قطب : روح ياشنودة هات العلب اللى وقعت هناك دى • •

شنودة : علب • • علب ايه يا قطب ؟

قطب : اجرى بس هاتها وبعدين ابقى اسأل •

(يخرج شنودة من حيث دخل قطب • • بينما يدخل قطب
الى دكانه فيترك فيه ما يحمل • • ثم يعود فيجد شنودة
قد أحضر العلب التى سقطت منه)

شنودة : دى علب بولوبيف يا قطب • •

- قطب** : ايوه اسم الله عليك .. والله انا ماكنت عارفها ياشنودة .
- شنودة** : مش عارفها ازاي .. دا البولوييف ده معروف قوى ..
دا شيء معتبر خالص .
- قطب** : معمول من ايه ده يا عم شنودة ؟
- شنودة** : معمول من ايه ؟ البولوييف ؟ البولوييف ده أصله يعنى ..
زى ماتقول .. بولوييف ..
- قطب** : آه .. طب حط دول عندك انت فى الدكانة .. انا لسه
حاروح اجيب شيله تانية وشوية سجائر معتبرين .
- شنودة** : انت نطيت على كامب يا قطب والا ايه ؟
- قطب** : لا ابدأ وحياتك .. دا من مخزن الراجل الطيب الحاج
فهمى .. الراجل ده كويس قوى يا عم شنودة ..
- شنودة** : ايوه باين عليه راجل طيب .
- قطب** : تعرف ياشنودة لما رحت معاه المخزن جا مشاورلى على
كرم كده وقال الحاجات دى مالهاش عوزة عندنا .. تعرف
لقيت ايه .. يا محترم .. حاجات بتاعة مية جنيه ..
وانا حا اسيبك بقى عشان اروح احولهم .. مش
ها اغيب عليك .
- شنودة** : روح يا قطب ربنا يسهلك .. روح يظهر النحاس حايفور
فى ستين داهية .
- قطب** : دا ربك كبير يا عم شنودة .. اهو رزقنا بالراجل الطيب
الحاج فهمى ده عشان ناكل من وراه لقمة عيش (يرغ
يديه الى اعلا) ربنا يخليك يا حاج فهمى ..
- شنودة** : ربنا عوض صبرك خير يا معلم قطب ..
- قطب** : ياسلام يا عم شنودة .. تصدق ان الراجل الامير الحاج
فهمى ده نفسه حلوة قوى .. طب ايه رأيك انه عاوز ييجى
يقعد هنا على طول ..
- شنودة** : امال يا اخى .. راجل ابن اصول .. روح انت يا قطب
ربنا يسهلك .. روح .. (ينصرف قطب) روح والعسذرا
القيامة لتقوم (يدخل دكانه) اما افتح واحدة من دول
ادوقها .
- (يظهر عبده وبكرية)

- بكـرية :** اوعى يا عبده انا مش ناقصاك .
- عبـده :** ايه بس اللى حصل يا بكـرية ؟
- بكـرية :** انت عارف ايه اللى حصل ؟
- عبـده :** وحياتك انت مانا عارف حاجة .
- بكـرية :** مانتتش عارف ازاي . انا بقالى اسبوع خدت منك ايه ؟
- عبـده :** انت واخده منى الشهر اللى فات ميت جنبه يا بكـرية .
- بكـرية :** احنا فى الشهر اللى فات والا فى النهاردة .
- عبـده :** وانت يعنى خدتى والا ماخدتيش ماهو كله علشانك .
- بكـرية :** اسمع يا عبده . انا مبعتش بكـرية بتساعة زمان . انا الكلام دا مابقاش يخش مخى . فلوسك انت حاجة . وفلوسى انا حاجة تانية . وعلى رأى المثل دراعك اليمين اقربلك من دراعك الشمال .
- عبـده :** انت فاهمة انى باضحك عليكى يا بكـرية . فاهمانى عاوز اخمك . طب خدى . انا محوش تلت تلاف جنبه شقا العمر كله . خديهم اهم .
- (يضرب يده فى وسطه وينزع حزاما من الجلد يفتحه ينزع منه النقود)
- الفلوس ايه . خليها معاكى انت . عشان تعرفى اننا اكرم منك . انا باموت نفسى فى الشغل عشان ايه . عاوز اتجوزك يا بكـرية . واعيشك طول عمرك واحدة ست . هاعوضك الايام الغم اللى شغلناها دى .
- بكـرية :** وهانسبب الشغلة دى يا عبده .
- عبـده :** امال انت فاهمة ايه . انا وحياة بكـرية لو كانش دول انجليز ماكنتن عملتها ابدا انما الواحد بيقول دول جماعة انجليز لا نعرفهم ولا يعرفونا وبكره يغوروا فى سبتين داهية واعيش انا وانت لوحدين يا بكـرية .
- بكـرية :** (وهى تتناول المبلغ) انا خايفة يا عبده .
- عبـده :** .ليه بقى يا بكـرية .
- بكـرية :** ياريتك بعدتنى عن الجو ده . ياريتك اشتغلت انت فيه وبعدتنى عنه . يمكن كنت معاك حاجة تانية خالص .

عبده : وانا كنت عارف ان انا هاحبك يا بكريه .. طب دنا لما
لضمت معاكى كنت عاوز أجز رجلك ويس .. كنت عاوز
اشغلك وخلص لكن اعمل ايه .. حبيتك يا بكريه وانا عمرى
ما حبيت .. حتى امى ماحبتهاش يا بكريه .. كنت دايم
باشوقها وازورها صحيح .. لكن عمرى ما حبتها شوفى
عمرى ما حبيت الا انت .. والحرب فاضل عليها تلت اربع
تشهر وتغور فى ستين داهية .. نكون عملنا قرشين ..
ونعيش ملوك زمانا .

بكريه : طيب يا عبده انا حالخش اشيل الفلوس جوه واجى ..
استثنانى خمس دقائق بس ..

عبده : هوه ابوكى جوه .

بكريه : انا عارفه .. مش انا جايه معاك لكن ما دام مش قاعد
مطرحه يبقى جوه .. حيرج فين يعنى .

عبده : طب ماتغيبش .

(الحاج فهمى يدخل المسرح متلصصا)

عبده : (يفاجئه) مرحب حاج فهمى ..

الحاج فهمى : (مرتبكا) اهلا عبده .. ابن حلال ، دنا بدور عليك ..

عبده : خير انشاء الله ..

الحاج فهمى : ماهو كله خير انشاء الله .. اسمع يا عبده (ينتحى به
ركنًا) الا اما يكون واحد بيحب واحدة يا عبده يقولها ايه؟

عبده : يقولها كل حاجة .

فهمى : مش فاهم .

عبده : مش هوه بيحب الست والست بتجبه ..

فهمى : ايوه يا عبده ..

عبده : خلاص يلاغيها ..

فهمى : يا سلام .. يعنى الواحد يلاغيها يا عبده ..

عبده : امال .

فهمى : طيب وايه الملاغية دى بقى .

عبده : كلمتين حلوين كده .. قرصة كده .. بوسة كده .. امال
المسالة فهلوة وتفتيح عين ..

فهمى : يا سلام .. يعنى الواحد يلاغيها .

عبيده : امال ٠٠

فهيمى : طيب ايه هيه الملاغية دى يا عبده ٠٠

عبيده : يقولها يا حبيبتي يا قمر ٠٠ انا بدوب فيكى ٠٠

فهيمى : الله ينور عليك ياواد يا عبده ٠٠ تعرف انا كنت لايص ٠٠

مش عارف أقول ايه ٠٠

عبيده : وهيه دى حاجة الواحد يلوص فيها ٠٠ دى حاجات

بولوتيكاً كلها ٠

فهيمى : حاكم انا يا عبده خام فى الحاجات ٠٠

عبيده : العفو يا حاج فهيمى ٠

فهيمى : زى مابقولك كده ٠٠ والله ٠٠ تعرف يا عبده ٠٠ انا لما

كنت شاب ٠٠ كنت غرقان لشوشتى فى الطين ، ماكنتش

لاقى احلق ، ولما ربنا سهلها بقيت غرقان لشوشتى برضه

٠٠ بس مش فى الطين يا عبده ٠٠ فى المونى ٠٠

(تخرج بكريه من دكان المعلم قطب متزينة)

بكـرية : ازيك يا حاج فهيمى ٠٠

فهيمى : اهلا ٠٠ ازيك يا بنتى ٠٠ هو ابوكى جوه ٠٠

بكـرية : لا ٠٠ ليه ٠٠

فهيمى : ده انا كنت عايزه فى كلمتين ٠٠

بكـرية : انده لك امى يا حاج ٠٠

فهيمى : لا انا عاوزه هوه ٠٠ انا حاقعد هنا استناه ٠٠

عبيده : طيب عن اذنك يا حاج فهيمى ٠٠ واصلين مشوار وراجعين

(يخرج عبده وبكـرية)

(الحاج فهيمى متقدما فى حذر ناحية دكان قطب ٠٠

فيفاجأ بخروج شنودة من الدكان وهو يتلمظ)

شنودة : (خارجا من الدكان ناظرا بدهشة للحاج فهيمى وهو يتسلل

الى دكان قطب ٠٠ يرقبه لحظة) صباح الخير يا حاج فهيمى

فهيمى : (مذعورا) بسم الله الرحمن الرحيم ٠٠ مين ٠٠ ازيك

يا عم شنودة ٠٠

شنودة : اهلا بالحاج فهيمى ٠٠ اتفضل ٠٠

فهيمى : هوه قطب مارجعش لسه والا ايه ٠٠

- شنودة :** رجع وراح تانى يا حاج ٠٠ ده بيدعى لك قوى عشان الحاجات اللى انت قولتله يحولها م المخزن ٠٠
- الحاج :** واجب برضه ياعم شنودة ٠٠ الناس لبعضها على كل حال
- شنودة :** لا والله اصيل يا حاج فهمى ٠٠ ماتعد يا راجل ٠٠
- فهمى :** انا خايف اعطلك والا حاجة يا عم شنودة ٠٠ يكون وراك مشوار عاوز تروحه ٠٠ ان كان وراك مشوار روح ٠٠ روح ٠٠ روح ٠٠
- شنودة :** حاروح فين يا حسرة ٠٠ دنا مابصدق حد اقعد معاه ٠٠ دنا لما اشوف حد اقعد معاه بابقى فرحان قوى ٠٠ لابقى ورانا شغلة ولا مشغلة ٠٠
- الحاج :** بكره تتعدل يا عم شنودة ٠٠ شىء الهى يا عم شنودة انا بحب الحتة دى ٠٠ زى مايكون حد عملى عمل ٠٠
- شنودة :** ماهى حتة بتاعة حظ يا حاج فهمى ٠٠ وانت راجل بتاع حظ طول عمرك ٠٠ بس يا خسارة القعدة ماتحلوش الا بالقزاة ٠٠
- فهمى :** طيب ماتجيب ازاة ٠٠
- شنودة :** ومنين يا حاج فهمى ٠٠ آل العين بصيرة والايدي قصيرة ٠٠
- الحاج :** كلام ايه دا اللى انت بتقوله ٠٠ ان ماكانش معاك فكاه خد فكاه لحد ربنا مايפקها ٠
- شنودة :** مالوش لازمة ٠٠
- الحاج :** مالوش لازمة ازاي ٠٠ انت بتشرب ايه ٠٠
- شنودة :** زمان والا دلوقت ؟ ٠٠
- الحاج :** هره انا باسالك زمان والا دلوقت ٠
- شنودة :** انا عارف ٠٠ وحياتك انت مابقيت اعرف زمان من دلوقت غير بالصنف ٠٠ حاكم زمان كنت اشرب كونياك ٠٠ وبعبدين مسكت فى العرقى ودلوقت بشرب طافيا ٠
- الحاج :** والطافيا دى بكام يا عم شنودة ٠٠
- شنودة :** الازاة برقع جنيه ٠٠
- الحاج :** جنيه ايه لحد ربنا مايفرجها ٠٠ قوم اخطف رجلك هات الازاة خللى القعدة تحلو

- شَفُودَة : (ينهض) طيب انا مش هاغيب عليك
الحاج : والا غيب ٠٠ انا قاعد هنا مستنظرك ٠٠
(ناظرا نحو دكان قطب) يا جميل هاغفل مستنظرك يا حلو
شَفُودَة : (يتوقف ٠٠ عن المشي وينظر لنفسه من الخلف) جميسل
المنظر عايجك قوى يا حاج فهمى .
الحاج : النفس الحلوة لها الجنة ٠٠ طب وحياة سيدنا النبى المنظر
هنا احسن م القبة القداوية .
شَفُودَة : طيب خليك قاعد بقى ٠٠ انا مش حاغيب عليك (ينصرف)
الحاج : لا خد راحتك قوى ٠٠
(ينهض ويقترب من دكان المعلم قطب ٠٠ ويزعق عليه
بصوت خفيض) يا معلم قطب ٠٠ يا معلم قطب ٠٠
ام بكريه : ايوه ٠٠ مين ٠٠
الحاج : انا الحاج فهمى ياست ام بكريه .
ام بكريه : اهلا وسهلا ٠٠ اتفضل ٠٠
الحاج : مالوش لزوم ٠٠ اصل انا كنت عاوز اقول لك كلمتين ٠٠
ام بكريه : ايوه يا حاج خير باذن الله .
الحاج : خير يا ست ام بكريه . الناس لبعضيها برضه يا ست
ام بكريه ٠٠ وانا راجل ألفى ومبسوط وربنا رزقنى
وقلوسى جاهزة والحمد لله ٠٠ وعاوز يعنى ٠٠٠
ام بكريه : اللى انت عاوزه على عينى وراسى يا حاج .
الحاج : تسلمى يا ست ام بكريه ٠٠ انا عاوز أقول يعنى آدى
عشرة جنيه يمكن تكونوا محتاجينها ٠٠ وكل شهر انشاء
الله مستعد أدفع زيهم وان احتجتوا حاجة فى نص الشهر
انا خدام .
ام بكريه : الهى يخليك لشبابك يا حاج فهمى .
الحاج : (ضاربا اياها على صدرها) دهده ٠٠ هوه عاد شباب
بقى يا ست ام بكريه .
ام بكريه : ليه يا حاج ٠٠ دا انت شباب ملو هدمك ٠٠ هو انت
بيعجبك العيال بتوع الأيام دى . دول ما فيهمش مروة ٠٠
هو فيه رجالة غير بتوع زمان .

- الحاج :** (ضاحكا) أيوه ما هو الدهن فى العتاقى .
أم بكرية : اسم الله عليك .. حقه بقينا عتاقى يا حاج .
الحاج : بقى انت عتاقى يأم بكرية .. هانت البدارة بحق وحقيق ..
أم بكرية : (بدلال) والله اللهم ما خلا فى الواحد حاجة .. دا أنا كنت اسم الله على مقامك بدر منور .
الحاج : يا سلام يا ست أم بكرية .. تعرفى أنا مانمتش من ليلة أول امبارح .
أم بكرية : ليه يا خويا بعد الشر عليك .. عيان .
الحاج : ولا عيان ولا حاجة .. أنما شئ الهى زى ما يكون شئ بيحرجرنى ع الحتة دى .
أم بكرية : (بدلال) ما هى قعدة شنودة حلوة .
الحاج : دامية تقطع شنودة وأيامه .. هو لو كان عشان شنودة لوحده كنت بصيت فى خلقته ..
أم بكرية : (بدلال أكثر) آمال عشان مين يا حاج ؟
الحاج : أنا حكم مايقتش طابق خلاص .. أنا .. أنا .. أنا ..
أم بكرية : انت ايه يا حاج فهمى .
(تسمع وقع أقدام)
الحاج : دا فيه حد جاى ..
أم بكرية : طيب لما أجرى ع الدكان أحسن أنا راسى عريانة .
الحاج : طب ما تخشى هنا فى دكان شنودة لحد ما يفوت .. خشى مافيش حد جوه .. (تدخل دكانة شنودة ويدخل خلفها)
شنودة : (يظهر على المسرح صاحب الأثر الذى سمعه الحاج وظن أنه عبده معه زجاجة طافية وورقة ملفوفة فيها بعض الطعام .. ينظر الى كرسى الحاج طويلا) .. هو راح فين ياخويا .. الناس بقت زى فرقع لوز ليه اليومين دول .. ياللا (يجلس ويفتح الزجاجة ويشمها) يا سلام (يغنى) والله زمان وانت حارمنى .. أما اقروم أجيب كباية من جوة ...
(ينهض ويهم بدخول الدكان فيفاجأ بالحاج وأم بكرية)
(يقف مكانه لحظات يفكر بعمق فى الخطوة التى يجب

عليه اتخاذها ثم ينسحب دون أن يشعر به الحاج أو أم
بكرية ويعود الى مجلسه وقد بدا عليه أسى شديد) .

شنودة : (يفتح الزجاجاة ويشرب ربعها مرة واحدة) هيه .. نكانتى
بقت مخبأ ماغيش حد أحسن من حد .. بقت جارحى أنا
راخر (ممسكا بالقاللة) بس من غير سكروته ..
(ممسكا الزجاجاة) السكروته بتاعتى أهه (يشرب) وصلنا
يا جدعان .. وصلنا ..

الله .. بقت فى الجيش المرابط أنا .. بقت جارحى
والقيامة ماقامتش .

أم بكرية : (تضحك) لا والنبي يا حاج فهمى ..
شنودة : حلر قوى .. بقت فرارحى يا جدعان ..

(يشرب) فتحت فرن يا شنودة ؟ (ينظر للزجاجاة) بس
فرن ايه ده اللى بازاة .. دا ولا اللى فاتح سبيل .
(يدخل الجارحى المسرح مهرولا)

الجارحى : عم شنودة .. ماشفتش الواد عبده .

شنودة : لا .. يا جارحى .. تعالى ياواد يا جارحى .. تعالى سلم
على انت جدع يا واد .

الجارحى : مانا طول عمرى جدع يا عم شنودة .
شنودة : لا انت النهاردة اجدع .

الجارحى : عجائب ياخواتى .. انت يعنى النهاردة ملعلع قوى
والازاة باين عليها لسة طازة .

شنودة : أصلى فتحت مخبأ ياواد ..

الجارحى : ! فتحت مخبأ .. وخذت اذن م الحكومة .
شنودة : لا مخبأ أهلى .

الجارحى : ومنخبى فيه انجليز يا عم شنودة .

شنودة : لا ياواد يا جارحى .. حاخبى فيه حجاج .

الجارحى : والحجاج حيستخبوا ليه ؟ خايفين م الطيارات روخرين .
شنودة : لا خايفين من المعلم قطب

الجارحى : طب لما أقوم أشوفه .. حاكم حصل حته دين فصل
النهاردة يا عم شنودة ..

شنودة : كده .. فصل ايه اللى حصل ؟

الجارحى : النهاردة فيه تفتيش ع المخبأ ٠٠ وعنده كان معاه جماعة
عاوزين يأجروه ٠٠
شنودة : كده ٠٠ لا قوم دور عليه ٠٠ بقى مخبأك عليه تفتيش
النهاردة الحمد لله مخبأى أنا سكته سالكة ٠٠ وماعندوش
مفتشين ٠

الجارحى : الله انت صحيح فتحت مخبأ يا عم شنودة ؟
شنودة : أمال يعنى بهزر ياواد ٠
الجارحى : طب أجبك عسكرى جيش مرابط يقعد عليه ٠
شنودة : مانى قاعد أهه ٠٠ مانى مرابط أهه يا جارحى ٠٠ ايه
الفرق ياواد ٠٠
(ناظرا للملابسه) والا عشان دا أبيض أصبغه كاكى اذا
كنت عاوز ٠٠

الجارحى : انت باين عليك سكرت وبتخرف ٠
شنودة : والله مانت فاهم حاجة ياد يا جارحى ٠٠ حتتك طول
عمرك بهيم ٠٠
الجارحى : هوه القطران اللى انت بتشربه دا حيخلى فيك عقل والله
ما حيخلى فيك عقل (ينصرف) ٠
شنودة : عنه ما خلا ٠٠ احنا يعنى عملنا ايه بالعقل (يغنى)
العقل زينة ٠٠ (يشرب الزجاجاة) العقل يا هوه ٠٠ والا
أقف وأقول النحل يا هوه ٠٠ (يصفق بيديه) النحل
يا هوه النحل يا هوه ٠٠ يا عالم الغارة ٠٠ خلصت ٠٠
دول يظهر انهم ماتوا ٠٠ أما أقوم أخطف رجلى أجيب
ازازة تانية ٠٠ أجيب ازازة تانية ماحدش عارف ٠٠
فرصة ٠٠ يمكن الحاج ما يرجعش مخبأى تانى ٠٠ يمكن
يروح للجارحى ٠٠
(ضحك أم بكيرية)

قطب : (يلتفت ناحية الصوت) منين ياخويا الحاجات الحلوة
دى ٠٠ دكان عبده وقافل ٠٠ يكون شنودة ٠٠
(ترتفع الضحكات مرة اخرى)

قطب : الله ٠٠ مظبوط من عند شنودة ٠٠ الراجل اتجنن ٠٠
لازم وقع فى وزه نضيفة ٠

(يقترب من ناحية دكان شنودة ثم يتراجع) اخص عليك
صحيح شايب وعايب (ترتفع الضحكات مرة أخرى)

قطب : (مبتهجا فى صخب) يا ميت حلالة ..
(ترتفع الضحكات مرة أخرى)

قطب : (صائحا) ، يا ترى منين الوزه دى . ياما نفسى اشوقها
بعينى ..

اقولك يا عم شنودة (يجلس) والله لقاعد ع الباب لحد
ما تطلع .. أما حتبقى فرجة (يفتح بعض اللعب ويأكل)
(يدخل شنودة المسرح ومعه زجاجة)

قطب : الله .. مين .. شنودة ؟

شنودة : المعلم قطب (يندفع نحوه) ازيك ..

قطب : ازيك انت .. انت بره والشغل داير فى دكانك ..

شنودة : (مرتبكا) أنا بالحق ما شفت حاجة يا معلم قطب ..

قطب : دنا باحسبك انت يا شنودة ..

شنودة : وأنا واللى خلقك ما شفت حاجة يا معلم قطب ..

قطب : ما تيجى نشوف دا مين .

شنودة : احنا مالنا يا قطب . ماتخلينا فى حالنا .

قطب : تخليك فى حالك .. حلوة دى .. دى دكانك ياشنودة .

شنودة : ما يمكن أرواح يا معلم قطب .

قطب : أرواح ؟ الارواح بتزغزغ بعض يا شنودة .

شنودة : ما يمكن أرواح ناس زى الواد عبده .

قطب : يا راجل اوعى أما نشوف مين اللى جوه .. مادية ..

يكون واد انجليزى جوه الدكان ..

شنودة : ماتفرض انه انجليزى يبقى حنخش ليه .. مش جايز يكون
معاه نار يا معلم قطب ..

قطب : وافرض معاه نار .. اذا كان انجليزى مش حنتخانق ..
نغوره .. فى ستين داهية وبس ..

شنودة : يا قطب مالناش دعوة ..

قطب : يا راجل اوعى .. الله بقى .. هوه احنا جنفتح فرارجية
زى الواد عبده (يندفع نحو الدكان وشنودة خلفه) الله

الحاج فهمى .. ومين ؟ أم بكريه أم بكريه بتعملى ايه
هنا يا ست ..

الحاج : احنا يا معلم قطب من غير مؤاخذه ..
قطب : ومن غير مؤاخذه كمان يا حاج فهمى .. من غير مؤاخذه
يا بر فلولس حاضرة والحمد لله .. ياراجل يا طيب ..
شنودة : ما بلاش الفضايح دى يا قطب .. الحاج كان بيتفاهم مع
أم بكريه ..

قطب : بيتفاهم يا شنودة .. بيتفاهم .. بقى أنا اللي قاعد طول
عمرى محافظ على شرفى يجزالى كده .. ومن مين ..
أم بكريه .. اوعى .. سيب (يخلع الجلباب) اوعى
يا شنودة (يمزق القانلة)
شنودة : خد رايح فين ..

قطب : اوعى سيبنى يا شنودة .. أحسن أجيب كرشك ..
الحاج : أنا خدامك يا معلم قطب .. اللي انت عاوزده كله أنا
خدامك .. فلولس حاضرة والحمد لله ..
قطب : خدامى .. يا ضلالى .. أنا المعلم قطب يحصلى دا كله ..
طب على الحرام من عيشتى لجايب كرشك (يندفع نحو
الدكان وشنودة خلفه)

الحاج : هو قطب اتجنن ولا ايه ..
أم بكريه : انت واقف ليه .. ماتيلنا بينا ..
الحاج : ياللا بينا على فين يا أم بكريه ..
أم بكريه : ياللا نهرب من هنا ..
الحاج : أهرب فين بس .. أنا راجل صاحب عيال وعندى أشغال ..
أنا ورايا أشغال يا ست أم بكريه ..
أم بكريه : أشغال فى عينك راجل ما تختشيش .. ولما وراك أشغال
ايه اللي جابك تخرب على ..

الحاج : أشغال بس يا ست أم بكريه .. أشغال ..
أم بكريه : (تصفعه بالقلم) امش قدامى ياراجل ياعرة ..
قطب : اوعى يا شنودة .. أنا لازم أشرب من دمهم ..
شنودة : ياراجل اعقل ..
قطب : اوعى يا شنودة (يصفعه على وجهه)

(يندفع بالسكين الى داخل الدكان) ويكزن الناس قد

تجمعوا حول شنودة)

اصوات : ايه العبارة يا خواجه شنودة .

شنودة : عبارة سودة بعيد عنكو .

اصوات : ايه اللي حصل ؟

شنودة : ولا حاجة ..

اصوات : چرا ايه للمعلم قطب يا عم شنودة .

شنودة : مصيبة كبرى بعيد عنكو :

(يندفع قطب خارجا من الدكان)

قطب : (والسكين فى يده) همه راحو فين .. راحو فين ؟

(يخرج وخلفه شنودة)

يبدأ الناس فى الانصراف ويتبعون قطب وشنودة ويخلو!

المرح تماما .. ويدخل سمير قادما من احد الحوارى ..

يرتدى بدلة الشغل ليتقدم الى دكان شنودة وينادى عليه

فلا يرد أحد فينادى على قطب .. فلا يرد أحد فيجلس

على الكرسي ..

سمير : همه راحوا فين ياخويا ؟ دى حكاية تنكتب فى الجرائد ..

عم شنودة وقطب سابوا الحقة دا لازم للشديد القوى ..

(يجلس ويفتح جرنالا ويقرأ)

سمير : (يقرأ) الألمان ينسحبون على طول الجبهة . يتوقف عن

القراءة عندما تتصاعد فى الجو ضحكة امرأة (فينظر

نحو مصدر الصوت فيرى هدية فى ملابس صارخة الألوان

ومعها جندى انجليزى يترنح من شدة السكر ، هدية معها

سيجارة وسكرانة فيهب سمير واقفا ينظر نحوهما بغضب) ..

هدية : (تضحك) هالوا سمير .. هاو دو يو دو .

سمير : اخص عليكى وعلى اللي رباكى .. مش مكسوفة من نفسك

والنبي ..

هدية : (تتوقف مع العسكري امام سمير) مكسوفة من ايه يادلعدي

قاعدة مع قطب ، مصاحبة شنودة ، ملطوعة طول النهار

جنب الحيط لا شغلة ولا مشغلة (تضحك)

الانجليزى : (ينظر لهدية ويشاور على سمير) نو جود ..

سمير : طيب امشى انجرى من هنا أحسن و حياة النبي اشرب
من دمك ..

هدية : هه .. ما يحكمش .. حاسب شوية ما تتحمش قوى كده ..
واقفة فى ملكك انا .. والا واقفة فى ملكك ..

سمير : والنبي ان ما مشيتى لموتك ..

هدية : تموتنى .. تموتنى دا ايه يادلعدى .. ما يحكمش ..

سمير : (يتقدم سمير نحوها) خدى الكلب دا فى ايدك بقولك
وانجرى من هنا *

الانجليزى : ايه ولد * ياللا .. نو جود بوى

سمير : (يدفع هدية بيده) غورى فى ستين داهية *

الانجليزى : ولد شوقتى بنت *

سمير : روح اتنيل انت راخر ..

الانجليزى : يو نايت ..

سمير : دنا نايت أبوك .. (يضربه والانجليزى يبادل الضرب ..

ثم يقع سمير على الأرض فينتزع الانجليزى مطوأة من
جيبه ويهجم بقتل سمير فتصرخ هدية وتهجم على الانجليزى
من الخلف فيدفعها بيده وتسقط على الأرض فتتنهض وتسحب
زجاجة عم شنودة وتنهال بها ضربا على رأسه ليسقط على
الأرض ثم ينهض فتنهال عليه ضربا مرة أخرى فيسقط على
الأرض ثم ينهض ويصرخ ويفر مذعورا فتحاول ان تلحق
به فيهجم عليها سمير ويمنعها فتحاول اللحاق بالانجليزى.
وقد استحوذت عليها حالة هستيرية وتبكي بحرقة) *

سمير : ايه يا هدية .. هدية انت كنتى هتموتى .. العسكرى.

الانجليزى ..

هدية : (وهى تبكى) ما هو كان حيموتك يا سمير ..

سمير : طيب ياللا بينا يا هدية .. ياللا يا هبيبتى ..

هدية : حنروح على فين يا سمير *

سمير : تعالى نروح اى حته المهم نبعد دلوقت عن الحته دى *

الراجل الانجليزى ده مش حيسكت *

هدية : طيب بس انا حاروح فين *

(يدخل شنودة لامثا متعبا)

شنودة : (ناظرا لسمير) ايه الحكاية يا بنى يا سمير ؟

سمير : ولا حاجة يا عم شنودة دا واد انجليزى رذل رما جنته
علينا .

شنودة : ومين دى .. هدية .. ازيك يا ام مزيكه ..

هدية : جرا ايه يا عم شنودة .

سمير : دى كانت حتموت الانجليزى عشانى يا عم شنودة ..

شنودة : هدية .. اللى كانت حتموت الانجليزى .. عجائب ..

سمير : اى والله يا عم شنودة .

شنودة : طب على خيرة الله .. ربنا يهدى العاصي

سمير : مسكينة والله يا عم شنودة اهى مش عارفة تروح فين ..

شنودة : انتو مش بتحبو بعض ما تتجوزوا وتتأووا فى اى حته .

سمير : فين بس يا عم شنودة ما انت عارف ازمة المساكن ..

دنا وامي ساكنين فى حته اودة .. يعنى اخدها تنام معايا

انا وامي .

شنودة : ما تنام انت عندها يا سمير .

سمير : ماهى ساكنة مع اربعة من زمايلها اللى بيشتغلوا فى صالة

شوشو فرنساوى ..

شنودة : ورطة بالحق يا سمير .

سمير : اهى لما جت الفاس فى الراس الواحد اتلبخ يا عم

شنودة ..

شنودة : وحتلبخ ليه .. ما تيجى تناموا فى دكانتى .

سمير : صحيح يا عم شنودة .. يعنى نقدر نقعد كام يوم كده

لحد ما ندبر امورنا .

شنودة : الدكان تحت امرك يا بنى .. روح هات اى حاجة تناموا

عليها وتعالى اقعد فى الدكان ..

سمير : والله فكرة يا عم شنودة ايه رايك يا هدية ..

هدية : انا ماليش رأى يا سمير .. اللى تشوفه .

سمير : يعنى ننام فى دكان شنودة .

هدية : اللى تشوفه ياسمير .

سمير : طيب يلا بينا يا هدية .. ياللا نجيب اى حاجة ونيجى ..
(ينصرفان من المسرح ويبقى شنودة)

شنودة : (ناظرا الى الجهة التى انصرفا منها) بس اياك تصدق
أمال وتعيش معاه .. (ممسكا بالزجاجة) انكسرت رخرة
(ضاربا يده فى جيبه) طيب نروح نجيب ازاوة ثانية ..
بس اياك ربنا ما يرزقناش باللى يكسرهما .. (ينصرف)
(بعد انصرافه يدخل المسرح الانجليزى الذى ضربته
هدية .. ومعه جنود كثيرون يشير لهم الى الشارع ويتكلم
معهم ثم يسقط مترنحا على الأرض فاقد الوعي ..
ينهار الانجليز تكسيرا وتحطيمًا فى الشارع ويعتدون على
المارة اثناء المعركة يدخل قطب الى المسرح ممزق القانلة
منكوش الشعر شاهرا سكينه فى يده فيفاجأ بالانجليز)
قطب : ايه دا ياولاد المجنونة .. غليتوا المش علينا وخربتوا
بيتنا .. خربتوا بيوتنا ياولاد الهرمة ..

(يتحاشاه الانجليز فى بداية الامر .. ثم ينهال عليه
أحدهم بقضيب حديدى فى يده ويهوى على راسه)

قطب : آى .. وكم ان حتموتونى طب خد (يضرب احدهم
بالسكين ثم يضرب الآخر ويجرى فيجرون خلفه وهم
ينهارون عليه بقضبان الحديد والزجاجات والمطاوى ...
يسقط قطب فى نهاية المسرح .. ثم نهض ويختفى والانجليز
خلفه يتبعونه فى اصرار ثم يعودون ينظفون اسلحتهم
ويحملون الانجليز الجرحى وينسحبون من المسرح ..
وتضاء الأنوار ومع الأنوار التى تضاء بالتدريج يدخل
عبده والجارجى وبكرية المسرح ..

عبده : ايه ده .. بسم الله الرحمن الرحيم .. هيه حصلت غارة
والا ايه ..

بكرية : يعنى هيه الغارة مش حتحصل الا على شارعنا .. ما الدنيا
كلها فى أمان الله ..

عبده : أمال ايه اللى حصل .. دا زى مايكون طور هايج .. دخل
الشارع ..

الجارجى : غضب ربنا وحياة سيدى بدر ..

عبده : يا أخى انتيل واقفل بقك انت راخر ..

الجارحى : ايه هو انت متسد بقى كمان يا عبده .. انت بتاجر المخبأ
ولا بتاجر بقى ..

عبده : انت تتكتم ..

الجارحى : طب انا مش ماتكتم يا عبده .. انا مش ماتكتم ..

بكرية : احنا حنتخافك والا تشوف ايه اللي حصل

عبده : اللي حصل ما هو باين قدام عنيئا ايه ..

بكرية : (تنادى على امها) يا ماما .. يا ماما

عبده : ماما ايه انت رخرة .. ما الدكان قدامك حتت ايه .. هوه

معقول بيقى فيه ماما جوء

بكرية : امال ايه اللي جزا يا عبده (تبكى) يا حبيبتي يا ماما ..

ياترى ايه اللي جرى ..

(يدخل شنودة المسرح يترنح من شدة السكر)

شنودة : يوه .. يوه .. يوه .. ايه ده .. هو اتجنن المعلم

قطب ..

عبده : ايه اللي حصل يا عم شنودة ..

شنودة : المعلم قطب جرى ورا مراته والحاج فهمى

بكرية : (صارخة) يا حبيبتي يامه .. يا حبيبتي يامه ..

عبده : جرى وراهم ليه ..

شنودة : ضبطهم مع بعض فى المخبأ ..

عبده : (للجارحى) انت فاتح المخبأ على البحرى يا ضلالى

شنودة : لا يا عبده .. مش مخبأ الجارحى دا مخبأ تانى

مخبأ أهلى

بكرية : (باكىة) وابويا فين دلوقت يا عم شنوده

شنودة : أبوكى مسك سكينه وجرى وراهم ..

بكرية : ياللا يا عبده نهرب انا خايفة من أبويا ..

عبده : وحتهرب نروح فين احنا عملنا حاجة

بكرية : انا خايفة يا عبده ياللا نروح اسكندرية ..

عبده : ايه اللي حيودينا اسكندرية احنا ربنا سهلنا هنا والحمد

لله

بكرية : انا خايفة أبويا يموتنى يا عبده

- عبيده : وحيمرتك ايه ؟ هو اتجنن •
شثودة : هو اتجنن بس دا الجنان كويس •• دا اتخبل فى عقله
بعيد عنكو •••
- عبيده : الفلوس فين يا بكريه •
بكريه : الفلوس معايا عاوز منها ايه •
عبيده : ماتيهيا وياللا بينسا •
بكريه : حنروح اسكندرية يا عبده •
عبيده : اسكندرية ايه ويتاع ايه •• احنا نشوفلنا مطرح هنا قريب
نقعد فيه لحد ما الأمور تهدا •
- بكريه : يعنى مش عاوز تروح اسكندرية يا عبده •
عبيده : بعدين تروح اسكندرية يا حبيبتى •• بعدين •• لما الحرب
تخلص نبقى نروح اى حطة على كيفنا •• اسمعى ••
- عبيده : انا حسنتناكى عند المخيا عشان انا عندى مغاد مهم قوى مع
واحد انجليزى مليون فلوس يلا ما تفبييش خليك معاها
ياواد يا جارحى ••
- بكريه : واد يا جارحى •• تيجى تروح معايا اسكندرية •
الجارحى : والمخيا يا بكريه •
بكريه : انت يعنى بتاخذ ايه م المخيا •
الجارحى : اهو رينا رازقها •
بكريه : اهو برضه ميرزك •
الجارحى : وعبده مش حبيجى معانا •
بكريه : انت مالك ومال عبده •• انت حتيجى معايا والا لا ••
- الجارحى : ايوه بس هاعمل معاكى ايه ؟
بكريه : تهرب معايا •• استنى اما اخشى اجيب الفلوس واجى
(تدخل المسرح هدية وسمير يحملان بعض الامتعة)
سمير : ايه دا يا واد يا جارحى •• ايه اللى حصل •
الجارحى : عمك قتل اتخبل فى عقله •• قتل مراته والحاج فهمى
سمير : وراح على فين يا جارحى ؟
الجارحى : داير زى المجنون فى كل حطة • هيه عين وصابتنا وحياة
سيدى بدر •

سمير : لا حول ولا قوة الا بالله .. يا لالا يا هدية ..
(يقتريان من دكان شنودة) يا عم شنودة .. عم شنودة
(يدخلان)

بكرية : (تخرج من الدكان) قلت ايه يا جارحي .
الجارحي : ها قول ايه بس يا ست بكرية .
بكرية : حتيجي معايا والا لا .
الجارحي : وبس حاجي معاكي اشتغل ايه .
بكرية : تشغل زى عبده .
الجارحي : وهوه انا اعرف اشتغل زى عبده .
بكرية : مالكش دعوة بالشغل .. انت تتجوزنى وبس .
الجارحي : (يفرح) اتجوزك انت يا بكرية .
بكرية : ايوه .. الست مادام متجوزة تبقى حرة .. ما حدش له
دعوة بيها .

الجارحي : طب وناكل طوب يا بكرية .
بكرية : ماحنا حنشتغل .. وانا معايا كمان تلت تلاف جنيه
بتروح عبده نصرف منهم .
الجارحي : تلت تلاف ايه .

بكرية : تلت تلاف جنيه .
الجارحي : ياللا بينا يا بكرية .. سلامو عليكو يا سمير ..
سمير : على فين يا جارحي .
الجارحي : على بلاد الله .. سلامو عليكو . انا حاتجوز بكرية .
سمير : مع السلامة يا جارحي .
(يختفى الجارحي خلف بكرية)

هسدية : صفصفت الحنة والله يا نامس .. يا ميت خسارة .
(يخرج شنودة من الدكان)

شنودة : (تنطلق صفارة الانذار) ايوه ازعقى .. ازعقى ما نقت
خراب . وحياة العذرا القيامة لتقوم .

هسدية : ولا حقنوم ولا حاجة يا عم شنودة .. دا ريك بيمتحن
العباد .. ويا بخت اللى ينجح .
شنودة : ايوه يا بخت اللى ينجح . يا بختك انت يا هدية .

هـدية : انا يا عم شنودة • دنا ساقطة بالثلاثة •
شنودة : انت لسه قدامك كثير • انما احنا خلاص بقى ياللا حسن
الختام •

هـبة : ولا حسن الختام ولا حاجة •• بكره تتعدل
(يدخل عبده الى المسرح لامثا زائغ النظرات)
عبده : عم شنودة •• البت بكريه فين هية والواد الجارحى
شنودة : والله مانا عارف يا عبده •• هو انا عاد فيه دماغ اعرف
حاجة •

سمير : ما هربت يا عبده •• اتجوزت الجارحى وهربت
عبده : كلام ايه اللى انت بتقوله ياواد يا سمير •
سمير : وانا مالى انا يا عبده •• همم اللى قالولى •
عبده : هربوا ازاي يا واد ••
سمير : خايفة من ابوها ليقتلها •
عبده : هيقتلها ازاي وهو مقتول •
شنودة : مقتول •• مين اللى مقتول يا عبده

عبده : المعلم قطب •• مرمى عند المخبأ والناس بتقول الانجليز
موتوه •

انما البت بكريه والواد جارحى راحوا فين
سمير : بقولك طفشوا يا عبده •
عبده : طفشوا ازاي والتلات تلاف جنيه
شنودة : تلات تلاف جنيه بتوع ايه يا عبده •
عبده : شقى العمر كله يا عم شنودة •• شقى العمر كله •• اللى
دبتقهم فى حياتى شوية م الشمال وشوية م اليمين ••
تاخدمهم بكريه بنت قطب وتهرب •• وراحت على فين ياواد
يا سمير •

سمير : انا شوفت •• امى هربت ويس •
عبده : هربت بكريه بنت قطب •• والفلوس راحت يا عم شنودة
(بيكى) الفلوس راحت •
شنودة : وحتيط ليه يابنى يا عبده •• ما كل شىء راح هوه فيه
حاجة فضلت •

عبيده : (وهو ييكي) ما كانتش لاقية تفطر يا عم شنودة . . انه
اللى عملتها واحدة ست وحياتك والواد الجارحي الجريان
الواد الجارحي الجريان يعمل كده يا عم شنودة

شنودة : انت اللى علمته يا عبده . . تربية ايدك دى .
عبيده : انا عارف هيه راحت فين . هيه راحت اسكندرية . انا
وراكي يا بكريه والزمن طويل .

عبيده : شقى العمر كله . . شقى العمر يا عم شنودة . . طيب
يا بكريه . . اخلق شنبي ان ما شربت من دمك .
(ينصرف ويختفى من المسرح)

هدية : تبقى خيبة لو عتر فيها وموتها

شنودة : ده . . ولا يقدر يموت فرخة .

هدية : وتفتكر حيلاقها يا عم شنودة .

شنودة : حيلاقها فين . دى ابرة فى كرم قش .

هدية : طيب هيعمل ايه بعد كده .

شنودة : ولا حاجة حيخلق شنبه .

سمير : طيب قلت ايه يا عم شنودة .

شنودة : فى ايه يابنى .

سمير : فى الدكانة ؟

شنودة : انا دكانى تحت امرك يابنى .

سمير : طب احنا حنقعد بس كام يوم كده لحد ما نشوف مطرح
يا عم شنودة .

شنودة : وكام يوم ليه . . ما تقعدوا على طول . . انا هاتوكل على
الله .

سمير : تتوكل على فين يا عم شنودة .

شنودة : خارج بلدنا تانى يابنى . . ع الأقل لما اموت الاقى اللى
يشيلونى انما هنا بلد جاحدة اللى يموت فيها ما يلاقش
اللى يشيله .

هدية : مانت قاعد معانا يا عم شنودة .

شنودة : اقعد معاكر اعمل ايه يا بنتى انتو لسه قدامكرو ياما . .
انما انا خلاص خشى هاتيلى الصور اللى جوه .

هدية : الصور امة (تمد يدها بصور القديس)

شنودة : ايوه • كتر خيرك يا بنتى •• بينى وبينك لما بابص لهم
بانكسف •

هدية : وتكسف من ايه يا عم شنودة •

شنودة : اهو بقى •• مالوش لازمة • المهم انهم فضلوا •• اهم اللى
طلعنا بيهم م الدنيا •• ماعدش غيرهم • سعيدة بقى
يابنى يا سمير •• سعيدة يا بنتى يا هدية • انا راجع
بلدنا تانى •• لسه فاضل معايا حق القطر • يا سلام ••
اخص على دى بلد • ماعدش ينفع فيها غير الفرارجية
ويتروع المخايب •• وولاد بديعة • سعيدة بقى • سعيدة
كلكر •

هدية : مع السلامة يا عم شنودة •• مع السلامة •

سمير : ياللا يا هدية •• ياللا ننصف الشارع (ينهمكان فى رفع
الأنقاض تتصاعد فى الجو صفارة الأمان)
مش قلتك يا هدية •

(سقار)